

ASO LULU, 23 IANUARI 2019

Na toe faaauau Galuega a le Fono Aoao Faitulafono i le itula e 7:05 i le afiafi.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu. 1) 2018/2019.

FOFOGA FETALAI: Ou te faasilasila atu ua toe amatalia Tualumaga ma Galuega a le Fono Aoao Faitulafono. Malo le usufono malo foi le onosai. Faafetai le tauatai. E faia le tatou malologa ma tuu ese galuega a le Fono Aoao i le aoauli ua sola ua faapena ona tuuina atu le avanoa i le sui usufono o Salega Sisifo. Ia, ma ou te tapa ma le faaaloalo lau Afioga i le sui usufono mamalu e tulai mai e saunoa.

Afioga TOOMATA AKI TUIPEA (Salega Sisifo): E momoli le faafetai i lau Afioga i le Fofoga Fetalai mo le avanoa taua ua maua e le sui usufono o lenei itumalo. A o paia ma mamalu sauoo o le Palemene o Samoa, i ona tulaga faalupe, i le afio o lau Afioga i le Fofoga Fetalai, lau Afioga i le Taitai o le Malo, le Sui Taitai, le vasega o Minisita, ou te talitonu e le oo i ai se faamatalaga i o outou paia, o sa ma faiga, aua o paia e tumau mai le vavau e oo i le faavavau. O paia foi i afioga i Ofisa Sili o Pulega o Matagaluega ma Faalapotopotoga Tumaoti a le Malo, ia nuunuu atu ia outou paia, o sa ma faiga aua o paia e popo, e tumau, e le mafai e le sui usufono ona faaopoopo pe toese outou mamalu. O le faafofoga tapuai foi a Samoa mai mauga tetele e oo atu lava i mauga iti, faatalofa atu i le faafofogaaga. O le paia lava lea i Tama ma o latou Aiga, Aiga ma latou Tama, Tumua ma Pule, Ituaia ma Alataua, Aiga i le Tai ma le Vaa o Fonoti.

Ou te talitonu i lenei tausaga o lo o ua amata, ua atagia le alofa ma le agalelei o le Atua ia Samoa, ua leai se mala faalenatura ua afaina ai lo tatou atunuu, e ui o lo o tatou i ai i le vaitau e masani ona afatia ai la tatou folauga i tausaga taitasi ona o suiga tetele o le tau. O le mea lea faafoi le viiga ma le faafetai i le Atua ona o Lona alofa ma Lona agalelei.

Ae o le a vili tonu le ifi a Maina ma fagatonu le malama i se sao o lenei itumalo i le Tala Faatatau Faaopoopo Muamua o le Tupe 2018/2019. E faamauiina lau faamalo ma le faafetai tele i lau Afioga i le Palemia, le Sui Palemia, Afioga i Minisita aemaise o Minisita Lagolago ma lena Itu o le Maota ona o se tofa ua ae e faia se siitaga mo le aufaigaluega a le Malo i le amataga o lenei tausaga. Ou te talitonu o se taimi talafeagai ona ua feagai tonu ma le ae o aoga a le fanau, lea ou te talitonu lava lau Afioga, o se faautautaga poto ma se faautautaga tuuuumamao ua mafua ai. Ona faapea lea o sau faamatalaga, maumau e moomoga o lenei itumalo, pe ana faapea o le a ogatasi i le taimi e tasi le faatinoina o lenei siitaga. Peitai, ua malamalama lelei le sui usufono i le mafuaaga ua ala ai ona faasoasoa le siitaga ona o faiga faavae i le pulea o tatou tupe ina ia aua ne i afaina lo tatou tamaoiaiga, aemaise o galuega

masani faatino i totonu o Matagaluega taitasi ma le totogiina o a tatou nonogatupe o lo o faia mai paaga i atunuu i fafo.

Lau Afioga i le Fofoga Fetalai, na pau lava le atugaluga o le sui usufono ona a vaavaai i le afaina o le tau o le soifuaga, e mafua mai i le inflation, ona afai o le eleni mo se faatusatusaga lea e \$1.50 pe \$3 i le taimi lenei, o lona uiga, e oo atu i le tausaga lea, ua \$3.50, e oo atu foi i le isi tausaga ua \$4. Ae ana faapea e ogatasi, se meamanu e lagona e le aufaigaluega le lololo ma le suamalie o nei faamanuiaga ua maua ona o le tofamamao ma le faautautaga i le Malo. Ou te faapea atu ai, e talia e lenei itumalo le Tala Faatatau o le Tupe Faaopoopo ua i luma nei o le Fono a le Palemene.

Ae e i ai nai vaega o lo o fia faaali ai ni manatu. O le vaega muamua i le Tala Faatatau Faaopoopo o le Tupe, o lo o i ai ni vaegatupe o lo o fuafuaina mo le Esetete Tausi. E ui lava e tele lea vaegatupe, ae talitonu o se fesoasoani aoga i lenei Faalapotopotoga. E le gata foi i lea, afai e alu alu ae le mafai ona totogi, o lo o tele aseta tumau a le Esetete Tausi e mafai ona tapa i ai le Malo e faaoga. Ou te manatu, afai e alu alu le mafai ona toe totogi mai e le Esetete Tausi, e manaia ae ave ane se 100 eka e fai ai foi se taulaga foi lea o le industrial zone, free zone e pei ona i ai i Vaitele ina ia mafai ona faatuina ai ni pisinisi ma ni atinae, e le gata o le a faigofie ai i itumalo, Falelatai, Manono ma Apolima, aemaise foi o Savaii, e faigofie le faimalaga mai ma le tau omai mamao i Apia. E i ai la se manatu, manaia ae faataatia ae se isi vaega o Fanua o le Esetete Tausi, ina ia fuafua sea atinae mo le lumanai.

O lona lua, faafetai i lau Afioga i le Minisita o Galuega ona o talosaga a lenei itumalo sa tuuina atu mo le fausia ma le faaleleia o ona auala galue. O lea ua amata le galuega a se tasi o ou nuu i Fagafau, faafetai le pule, faafetai le magafagafa ma le amanaia o le talosaga. Ae ou te talitonu o lena lava o lo o i ai i lau faila nisi nuu o lou itumalo e pei o Fogatuli. O le nuu lea o Fogatuli ua ou maua tala, ua faalua ona fai survey, ua oo mai ma folafola e le sa pulea le lala i Salelologa faapea o le a faataunuu le galuega. Peitai, ina ua faatino galuega o auala galue i le tausaga ua mavae, e ese itumalo sa faatino. O lea lava la e faatali si o matou itumalo ma faapea mai, pei ua olegia le alaafaga, e le gata i le Malo, a o le sui usufono. Ou te tatalo atu ai ma lou ava ma lou migao, faamolemole, faalatalata ae i luga i lau faila le talosaga a Fogatuli. E le gata i auala galue i faatoaga, a o lo o i ai nai malumalu o Ekalesia, le Ekalesia Mamona ma le Ekalesia Asofitu, ua matua leaga faia lava le auala. Ou te talitonu o le auala lea e maua ai manuia. O Samoa o le atunuu kerisiano, e faamuamua foi Ekalesia i so o sana faigamea. E le gata foi i lea, o lo o i ai ma le tanevai i gauta. E taua tele le lelei o auala. Ia, ona tuutuu ane ai lea ma nai auala na o lo o i ai, Samata i tai ma Samata i uta i le tausaga fou i lau paketi. Ma lou faaaloalo lava.

Ona oo atu ai lea o sau faamatalaga i le Faalapotopotoga lea o le ACC. E taua tele tiute ma galuega o lo o faatino e le ACC. Ou te faamalo ma ou faafetai i le Faigamalo na latou faavaeina lenei Faalapotopotoga, e le gata ua tele ai aseta e maua e le Malo, ae ua faapena foi ona fesoasoani i nisi o manaoga e pei o taavale fuimu, taavale mo faalavelave faafuasei, lea e lata mai nei na fesoasoani ai i taavale e tolu, ae le gata foi i lea o le aveina o mai i fafo. O itu lelei ia o le ACC, ae a liliu i le isi itu o le coin, ona ou vaavaai atu lea, o tatou o tagata faisaoafaga, o lo o tipi a tatou tupe i totonu o lenei Faalapotopotoga. Ona ou faapea lea, se pei lava le ACC o se Faalapotopotoga aiafu, tulou le gagana. Ua ala ona ou taua le tulaga lea o le aiafu, aua foi o tupe a le aufaisaofaga lea o lo o tuuina atu i le ACC, ona o lea o le ACC ua invest i poloketi, teu foi faavaitaimi a latou tupe i Faletupe ona maua mai ai

lea o latou tupe faaopopo, ona alu ai lava lea o latou ma fai ai lava latou, a o lea lava e pulapula mata o le aufaisaofaga.

FOFOGA FETALAI: Malie le sui usufono leaga e matuia le saunoaga ae se i tulai mai le Minisita o Pisinisi ma Alamanuia.

Afioga Hon Lautafi Fio Selafi Purcell (Minisita mo Pisinisi, Alamanuia ma Leipa): Lau Afioga i le Fofoga Fetalai, ua manaia lava le faalogologo atu i le saunoaga a le sui usufono, ae pei ua tau avea sui usufono o le faaitu lea o matou lea e lavea ai ma le sui usufono lea e le o nofo mai o, pei a tau oo oo ni faamatalaga i ni tulaga le talafeagai. Ou te talosagaina lau Afioga ina ia aveese ia faaupuga faapea o le ACC e aiafu. Mo le silafia e le sui usufono, e leai lava ni poloketi a le ACC o lo o sosolo lava le ACC i le latou mandate na tuu i ai e le Malo o lo o i lalo o le Tulafono a le ACC e latou te ao maia saofaga a tagata. O lea na sao lava le saunoaga a le sui usufono e invest ae le faapea la o o le ACC o fai ai nisi mea. O investment na e fai e le ACC, o le investment ina ia tupu ai tupe a tagata ia e faisaoafaga, aua le lumanai o le aufaisaofaga. E leai lava se mea o fai e le ACC ina ia ave ma le ACC, leai, o mea uma lava ia o fale ma tulaga ia lea e fesoasoani ai le ACC, o mea uma lava o lea e mafai ona latou faia i lalo o le Tulafono lea o lo o pulea ai latou. Ae leai se mea faapea o o ai le ACC e fai ai lava a latou faiga. E leai se mea a le Matagaluega po o gain mai ai mo i latou lava. O mea uma lava o lo o invest tupe aua le mamalu o le atunuu ina ia lava seleni ina ia tulai mai se tulaga e manaomia ai se cover mo le atunuu atoa ae o la e lava le seleni tatou te tua i ai.

Ia o le faamalamalamaga lena. Faafetai i lau Afioga.

FOFOGA FETALAI: Malo. Ou te fautuaina foi le sui usufono mamalu i le faaaogaina o upu faauigalua e tapu i le tatou Tulafono Tumau. Ia agai i le saunoaga, faaoga se isi upu talafeagai.

Afioga TOOMATA AKI TUIPEA: Faamalulu atu i lau Afioga i le Fofoga Fetalai, ua vavevave mai le tu a le Minisita. O le uiga o le aiafu, e lei aiafu le aoga. E aiafu aoga o lea e alu aoga mo tagata ma le atunuu. Ae o le uiga la o lau faamatalaga, o lea lava e goto uma i totonu o le taga a le ACC, ae faapefea le au faisaoafaga. O lea la ou te faatuina atu ai....

FOFOGA FETALAI: Ou te fautuaina foi le sui usufono mamalu, i le faauigaina o upu faauigalua e tapu i le tatou Tulafono Tumau. Faaoga se isi upu talafeagai.

Afioga Lautafi Fio Selafi Purcell: Lau Afioga i le Fofoga Fetalai, o se mea e fia faasao leaga o lea lava e pei e tuuaia lava le Matagaluega o lo o goto ni tupe i totonu o le taga a le ACC. E leai ni taga a le ACC, o tupe o la e teu faafaigaluega, aua le mamalu o le atunuu. I lalo o le Tulafono o lo o i ai nei, o mea uma lava ia e tataua ona alu i ai ia tupe nei. E mo i latou e aafia i ni faalavelave faafuasei, o lo o alu i ai. E leai lava se mea e faapea ua i ai ni tagata ua o mai ae faapea ua fai atu i ai le ACC ua le lava le tatou seleni. Ona o lea ua faatau ai taavale ia ua ave ma le fuimu. Pe faapea foi ua le lava se tatou seleni, ua ave e faatau ai le CT scan la ua ave i le falemai. O mea uma ia o lea e aoga, aua o mea uma lava e link mo le saogalemu o tagata, ma ia vave ona foia faafitauli e tulai mai, pe afai e aafia i ni faalavelave faafuasei. Ae

faamalulu atu lava i le sui usufono, e leai lava ni tupe faapea o faaaoga e le ACC po o alu le aoga. O le faamalamalama lea lau afioga.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr.Sailele Malielegaio: Lau Afioga i le Fofoga Fetalai, o mea ia e eseese le au faisaofoaga. E le faapea e eseese ma le NPF. O le NPF la e toe foi mai lava i le tagata e sao, ia e ana ia tupe. Ao i, sei vagana ua e lavea, ona faatoa mafai lea ona e agavaa i i. A e lavea foi la, o se lavea foi lele, e te le nofo lava oe ma faalavea oe. O le mea lena o le faitogafiti le mea lena. Ae o lea e faaaoga ia seleni nei, e faatino ai foi ia galuega e aoga mo le Malo. E i ai taimi na leai ai se tatou CT Scan, e tala'u mai i Niusila e scan ai. E ave i Tutuila, o i la lea na ala ai ona maua le tatou faata, faata taugata lava. O lea foi la e i ai le isi faata lea e toe manaomia e sili atu le malosi. O lea la e aoga i tagata o le atunuu. Ao mea ia e le soona faia, ona o mea o faalavelave e tupu faafuasei, lea e aoga i ai faata ia. Ma le isi o lea foi e faaaoga e invest e teu faafaigaluega i totonu o galuega a le Malo. E pei o le fausia ai o fale i fafo, ona faasaoina ai lea o tupe a lo tatou Malo e alu vale i le totogiina o fale o papalagi i fafo. O lona uiga la, a fau le fale e pei o le fale la e i Ausetalia, ona totogi atu lea o le tupe e le Malo i i i le ACC, e totogi ai le nonogatupe lea, e leai se foreign reserve o faaaoga. O lea e fai lava o feuaiga o tupe, o lea e fai lava i totonu o Samoa. E leai la se mea o alu i fafo, o lea e i totonu lava o le atunuu. Ae o le mea e pito i sili ona taua, ia tupu mai faalavelave e agavaa mo le tupe lea, ao lea lava e i ai seleni a lo tatou Faalapotopotoga. O le faautautaga tataua lena o lea e faafae ai le Faalapotopotoga lena i lo tatou Malo.

FOFOGA FETALAI: Tulai mai le sui usufono mamalu, e toe lua ou minute.

Afioga TOOMATA AKI TUIPEA: Ua malamalama lelei le sui usufono i le tulaga o lo o faaaogaina ai tupe. Ae pei ona ou fai atu, atonu e matuia le upu lea aiafu ae sili la ona ou faapea, o le faaaoga tataua o saofaga a tagata ae e le maua mai ai se penefiti a tagata. O lea la ou te faatuina atu ai se teuteuga....

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaio: Lau Afioga i le Fofoga Fetalai, o lea e sese le faaupuga. Leaga o Tulafono e sosolo lava i luga o le Tulafono. Afai lava na fai lau saofaga, e pei lava o le insure, insure lea o faalavelave e tutupu faafuasei. O le eseese o le insure lena ma le insure o lou soifua, o le mea lena e faaigoa ai le isi mea o le insure ae faaigoa le isi mea o le assurance. O le mea lea i lou soifua, e faaigoa o le assurance, aua ua e mautinoa e i ai le taimi e te oti ai. O lea la e mafua ai ona eseese le faaupuga o mea. Ae a oo loa i le insure o afi, e ono le tupu se afi, ae o la e alu lava au tupe, alu lava au tupe, alu lava au tupe. A oo la i le selau tausaga e leai lava se afi e tupu e alu ai lava au tupe ma alu ai lava au tupe i le vasaloloa. E faapena foi i le mea lea, ua matua manino lelei le faataatiaga o a tatou mea. Seiloga e tupu le faalavelave ia te oe, ona faatoa mafai lea ona e agavaa. E tusa ai ma Tulafono na aumai pasia i totonu o le Maota lena. O lona uiga la o le tagata na te vaai maualalo i le ACC po o le ACC, o lona uiga ua vaai maualalo foi i le tomai na ala ai ona pasia e le Palemene lena ia le Tulafono. Lau Afioga i le Fofoga Fetalai, e pei o le mea lena o lea ou te toe tu atu ai, ina ia matua malamalama lelei i le aoga o le faaputugatupe lena. Ae le mafai la ona alu atu

ia te oe, seiloga lava e faamalieina le Tulafono, le ituaiga manua lena e manua ai. E le faapea e te nofo oe ma faamanua oe, ona e agavaa ai lea, e leai o le togafiti le mea lena.

FOFOGA FETALAI: Ua maea le taimi o le sui usufono.

Afioga TOOMATA AKI TUIPEA: Lau afioga o lea e tau faauma atu pe a tusa ai ma lou finagalo.

FOFOGA FETALAI: O lea ua ou fai atu ua maea le taimi o le sui usufono, ona o lea sa toe lua ou minute. Ae faai mai le saunoaga.

Afioga Hon Gatoloaifaana Amataga Alesana Gidlow: Lau Afioga i le Fofoga Fetalai..

FOFOGA FETALAI: Ou te le toe talia se lafo e faaopoopo ai le lauga a le sui usufono.

Afioga Hon Gatoloaifaana Amataga Alesana Gidlow: Faafetai i lau afioga.

FOFOGA FETALAI: Faai mai le saunoaga a le sui usufono.

Afioga TOOMATA AKI TUIPEA: Faafetai mo le avanoa ua toe tuu mai, e faauma atu ai sau faamatalaga. Ou te faatu ina atu, faatupu manatu se tuualalo lau Afioga i le Palemia ma le Kapeneta, se teuteuga i le Tulafono a le ACC. Ma o teuteuga la e faapea, ave atu pea e faatuualalo atu, ae pule lava le Malo pe talia pe leai.

FOFOGA FETALAI: O lou finagalo ae e le o le tulaga lea o lena mataupu.

Afioga TOOMATA AKI TUIPEA: O le tuualalo, e a pe a fai se teuteuga o le Tulafono. O se teuteuga la o le a tuu atu pea. Muamua ia poloaina le ACC, ia faamaumauina uma tupe a le au faisaofaga. Ia tuuina mai ina ia silafia e le tagata lana saofaga i le faaiuga o tausaga taitasi. Lona lua, ia tuu i ai sina lua pasene o se tului, e faaopoopo i luga o lana saofaga e tuu i ina e teu ai faateugatupe. Lona tolu, aua nei nonoina, aua nei faatagaga e guarantee ai ni loan. Lona fa, seiloga lava e maluu le sui ona aumai lea e ave e fai ai lona maluu. E tusa o se insurance foi lea, e tapa i ai le tina po o le tama, po o fanau foi, i le taimi e uma ai lou soifua. Aua e leai ni insure faapea, o lea faatoa tau amata e le isi vaega, ae sili le amata mea o le Malo. Aua e ala ona ou fai atu, o se tasi lea o Faalapotopotoga...

FOFOGA FETALAI: Ua ou faauilavea i le saunoaga a le sui usufono e faai mai le saunoaga.

Afioga TOOMATA AKI TUIPEA: E faai atu ai sau faamatalaga, ou te faatalofa atu ma ou faafetai atu i lou itumalo, o lou itumalo pele o Salega i Sisifo mo la outou tapuaiga. Faafetai tele ia outou tatalo, ua maua ai le lototele o le sui usufono. Manuia tele lau Afioga i le Fofoga Fetalai, lau Afioga i le Palemia ma le Kapeneta, aemaise foi o lena itu o le Maota faapena foi lenei itu o le Maota, ma le tapuaiga a Samoa.

FOFOGA FETALAI: Malo faafetai. O le manatu lava ia tulei la tatou galuega, o lea ua outou faafofoga ua faatu le lafo e pei ona amata ai nei la tatou fonofono. O le manatu lava ia faapena, ae e le o se agaga e faapea e taofiofi i finagalo o sui usufono mamalu. Ae i ai lava avanoa e auala ai fautuaga ma tulaga faapena. Ou te tapa ma le faaaloalo lau afioga i le sui usufono mamalu o Anoamaa i Sisifo.

Tofa Hon LAUOFO FONOTOE NUA FESILI PIERRE LAUOFO (Anoamaa i Sisifo): Faafetai i lau Afioga i le Fofoga Fetalai. O au lea sa ou tau tulai atu e faaluaina ia teuteuga ia ua tuuina atu e le sui mamalu. Ae ona o lea ou te le i lauga, o le a amata ia lau lauga.

Faafetai i lau Afioga mo le avanoa, e manatu foi lou sui usufono, o lea ua sii le tai le sa o lo tatou Palemene, aua lana folauga i lenei foi tausaga fou 2019. Ou te manatu foi ua maea i le malama analeila ona e momoli le talosaga e talosia ai faiva o sui usufono uma o le Maota o lenei aso. Ae e i ai foi le lagona o lea ua i ulugaluli liaga o le tai, le paia faaifo gata o Samoa. Ona faapea lea o se leo, faatini ia o tausala outou sa ma faiga, ponaoo ma tulatoa o faleupolu tofia. Aua o latou o lo o tausia upu a le atunuu.

Lau Afioga i le Fofoga Fetalai, e tusa ai ma lau faaaliga i le aso ananafi. Ua faia foi se pou o le Maota fonofono nei ona o le valaau paia a le Atua i le afioga i le sui mamalu ia Pa'u Sefo. O la matou tatalo e faaopoopo ia alofagia e le Atua, ia faapena ona faamaise le Atua i le faletua faapea le aiga itutetele ma itu taulagi ona o le malaga a le maliu ma le oti. Lau Afioga i le Fofoga Fetalai, e faafeiloai atu i lau afioga faapea foi sui usufono mamalu uma o lenei Maota, aemaise le faafofogaaga a Samoa o lo o faafofoga mai i Maota ma laoa i lenei itula o le afiafi. Faafeiloai atu ma ofo alofa atu. Ou te tulai e faaleo se manatu ma se lagona e tusa ai ma le Tala Faaopoopo (Nu.1) o le Tupe. E pei ona saunoa malamalama i ai le Afioga i le Minisita o Tupe i le masina ua tuana'i atu. Sa ia taua ai nisi atinae tetele a le Malo sa faatino i le tausaga 2018. E aofia ai le faafouina o le tatou malaevaalele faava-o-Malo i Faleolo faapea foi le tatou uafu tele i Matautu tai, e le gata i lea o le faalateleina o aualatetele e agai atu i le itu i sisifo o Apia ma le tele o isi atinae tetele ua tatou molimauina. E le selu atu, lau Afioga i le Minisita o Tupe, ou te manatua ai upu a le atunuu e faapea, -A ae i fanua faatamasoalii i le tai, ona faapea lea o le upu a le atunuu, -ua faamalo le tautai ae Faamalo le tautai ae i lenei itu o le Maota aemaise le aiga Kapeneta o lo o galulue. A oo foi ina ae mai faiva o le atu vaivao, ona faapea foi lea o upu a le nuu, -Se o se togi le seu ua lagatila ua faapulou le tualima ua faamalo fai o le faiva Faamalo le galulue, e i ai lo matou lagona o le a foi se lagolagosua atu a lenei itu o le Maota, Afioga i Taitaifono a Komiti Eseeese, faapea foi Afioga i sui usufono mamalu. E i ai lo matou talitonuga o le sa o Samoa e fau tele, o la tatou galuega e fai faatasi aua se manuia lautele o le atunuu.

Lau Afioga i le Fofoga Fetalai, e faamauina le faafetai a lenei usugafono i le fuafuaga ua i ai le Afioga i le Minisita o le NPF po o le Afioga foi i le Minisita o Tupe mo le siitaga o le penisione mo tagata matutua, sii mai le \$135 i le \$145 i le masina. Sa tele foi ni manatu ma ni lagona i nisi foi fetuunaiga, peitai, ua saunoa le Afioga i le Minisita ananafi, ia ua faaopoopo foi le Afioga i le Palemia i le tele o manatu faatupu manatu i lea foi mataupu i nisi o manatu ma ni lagona e faaopoopo pe sii le tupe ae faataatia ese nisi o faamanuiaga. O lenei foi se lagona o lenei usugafono pe a tatou oo atu i ai i le iloiloaga o lenei faamanuiaga.

I se taimi lata mai e le i mamao atu le asiasiga sa oo atu ai i gauta i le tatou falemai faamamatoto e asi foi se tasi foi o gasegase, lau Afioga i le Fofoga Fetalai, matauina le vaapiapi tele o le falemai lea, ua le lava se avanoa, a ua toatele ma faatupulaia latou o lo o ua gasegase foi i lea ituaiga gasegase, ua maua se fuainumera po o le 120 ua i ai nei. A o le talosaga, e manatu foi i aiga o i latou o lo o gasegase e autovaa atu i le falemai e avatu e faatino togafitiga i lea aso ma lea aso, pe leai se isi avanoa o le tatou falemai tuai sa i ai i uta e sii i ai le falemai lea, se vaega tele atu ina ia lava le avanoa....

FOFOGA FETALAI: Malie le sui usufono o lo o tulai mai le Minisita o le Soifua Maloloina.

Afioga Hon Tuitama Talalelei Tuitama (Minisita mo le Soifua Maloloina): Lau Afioga i le Fofoga Fetalai, e le faalavelavea le saunoaga matagofie a le Afioga i le sui usufono, e tataua lava ona ou tulai atu leaga o lea e agai pea i ai lana saunoaga. O lena tonu lava le fuafuaga o lea ua faagasolo i le taimi nei, o lea ua amata ona renovate le laboratory tuai ma le faletalavai la e tutu faatasi, masalo toeitiiti maea le galuega o totonu o le fale, e siitia atu i ai le tatou auaunaga faamamatoto. O le taimi nei, e na o le 20 nofoa la e faaoga, ae faamoemoe a maea le galuega lea o lo o faagasolo i le taimi lenei ma faatino le siitaga e pei ona ioeina ma pasia e le Kapeneta, ia, e oo atu i le 60 nofoa e mafai ona faaoga, ona talafeagai tonu a lea ma le finagalo lea e faaalua e le sui usufono mamalu. E momoli atu ai foi le faafetai mo le afea o lea Matagaluega i lea tulaga e lagolagosua ma faufautua aua tulaga matagofie mo le agai i luma o le auaunaga. Ma le faaaloalo i lau Afioga i le Fofoga Fetalai.

FOFOGA FETALAI: Malo faafetai. Tulai mai le sui usufono e saunoa.

Tofa Hon LAUOFO FONOTOE NUA FESILI PIERRE LAUOFO: Faafetai i lau Afioga i le Fofoga Fetalai. Faafetai foi i lau Afioga i le Minisita mo le tali malamalama i lea vaega mo se fuafuaga e toe faaopoopo nisi nofoa mo le falemai faamamatoto lea i Motootua, ia, se i silasila ane i le tatou lala o lo o i Savaii, o lo o i ai foi nofoa pe toe faaopoopo nisi nofoa mo le motu i Salafai mo i latou o gasegase i lea foi ituaiga gasegase.

Ae e le tuua ai le matou faufautua ma tuualalo pea ina ia aua ne i pa polokalame faalauiloa ina ia tuutiitia ai gasegase nei o lo o aafia ai o latou fatugao. Aua pei e matau atu na mafua mai lava ona o taumafa. O lena le matou fautuaga, aua e tataua lava ona o faatasi tulaga ia o le treatment faapea foi ma le prevention aua e tataua lava ona faalauiloa pea nai polokalame na mo le silafia e le mamalu o le atunuu. Pei o lo o matauina e lou sui usufono se vaegatupe i totonu o le Tala Faaopoopo o le Tupe mo i latou o le a lavea i le vaea mai le tuufaatasiga o le falemai i Motootua, le NHS ma le MOH. Po o le a se faamaninoga o lea tulaga lau Afioga i le Minisita aua o lea e pei ona matau atu e i ai i latou o le a vaea a o lea foi e loma le talanoaina o le Tulafono Tau Faaofi a lau Afioga ina ia faataunuu ai lea fuafuaga a le tatou Malo.

E momoli atu le faafetai ona o lea e i ai le fasi seleni ua faaagaaga mo le faamamaina o le aitalafu o lo o i le Faletupe o Atinae, ina ia faamama ai aitalafu o le falemai lea sa taua o le MedCen i Vailima. Ou te talitonu ua tele tausaga o taumafai lea mataupu, a o lea ua tulai mai i se tulaga masuiga malie. E momoli atu ai le faafetai i lau Afioga i le Minisita o Tupe, ia o lau Afioga

foi o le Minisita o le Faletupe o Atinae, ina ia faaavanoa lea nofoaga e toe see mai i le Malo aua se isi atinae taua a le Malo e faatino ai, po o le faamatuu atu foi i se tatou paaga, se tatou development partner, aua o latou ia o lo o fesoasoani mai i a tatou atinae. Malo faafetai mo ia fuafuaga. E i ai le popolega lau Afioga i le Fofoga Fetalai i mea ua tulai mai i lenei vaitau, o ituaiga soligatulafono, ua matau ma ua maua foi lipoti i le soligatulafono lea o le fasioti tagata. E le o se solitulafono fou, ua leva. E pau lava lea o le mea ua popoe ai foi lou taofi, ona o le faatinoga ua i ai i lenei vaitau, ua matuia, ua ogaoga, ae maua ai foi ma lipoti e masalomia le aafia o tagata o lo o faatinoina nei soligatulafono i le fualaau faasaina lea o le aisa. Ma se i toe tagai ane le Malo faamolemole i ia tulaga. Ou te talitonu o lo o faatino se galuega lelei a le Ofisa o Leoleo, ae atonu o lo o manaomia foi e le Ofisa o Leoleo se isi fesoasoani faaopopo. Atonu e i ai ni masini faaneionapo e fesoasoani ai i leoleo i le sailiga ma le tulaga o latou osofaiga ina ia tineia le tulaga lea o latou o lo o gaosia le fualaau faasaina lenei o le aisa. Ua maua i le faalogo ua faasolo ina sosolo faaafi i totonu o le atunuu, a o se fualaau faasaina e gaosi lava pe mafai e le tagata ona gaosi i totonu o lona fale. A o lea foi e maua i lipoti mai fomai ma latou atamamai, e ese ma le tuga ma le ogaoga o mafaufau o i latou e faaogaina lea ituaiga fualaau faasaina. Ma e pei ona ou fai atu, o le tulaga lea, o lea pei e fetauaiga ma maua i nisi o lipoti i nisi o faalavelave e le i mamao atu nei. Atonu po o le taimi la lenei, ua tatau foi ona toe silasila i ai le Malo i le tulaga o faasalaga o soligatulafono faapea, e le gata i fualaau faasaina lenei, ae faapea foi isi soligatulafono matuia. O lea ou te manatua na aumai le Tulafono i totonu o le Maota lenei i le 2007, sa ou lauga ai foi, le Tulafono lea o le Narcotics. Na aumai e faaopopo ai isi fualaau faasaina matuia ia ma sii ai i luga le faasalaga o latou, latou te gaosia ma latou, latou te faasalalauina pe faatauina atu. O lea ou te manatua na sii mai le 7 tausaga i le 14 tausaga. Atonu o se taimi lelei lenei se i toe silasila ane i vaega ia, e tatau ona toe i ai ni teuteuga, aua a faalogologo atu i ituaiga soligatulafono nei i isi atunuu e mamao, ia e au i le tai 20 tausaga, 30 tausaga taimi e falepuipui ai. Ia ae atonu o lea foi e faagasolo le fausiaina o le tatou falepuipui fou, o le taimi foi lenei ou te lagona e au ia, e silasila ai i vaega faapea. E tatau foi ona i ai se vaega i totonu o le tatou falepuipui fou mo latou ia o lo o faaogaina sese mea o fualaau faasaina, o drug abuses. E tatau foi ona silasila i ai, aua e manaomia foi togafitiga i le tulaga o latou mafaufau po o le mental capacity. O vaega ia lau Afioga, aua o le tatou falepuipui lea sa saunoa manino le Afioga i le Minisita o Tupe ma le Minisita o Tupe Maua, i lena tausaga ua tuanai, pe a ma le \$20miliona i le \$30miliona le tupe e alu ai. O lo o faagasolo i le taimi nei, e matau atu pe \$14miliona lea ua faaaluina, a o lea ua aumai i le Tala Faaopopo Muamua lenei o le Tupe le isi \$2miliona e toe taumafai ai, ma e tatau ona uunaia le tatou galuega lea ina ia vave faauma ina ia mausali ma ia malu tulaga uma o le falepuipui lea.

Sa saunoa le Palemia i le taeao analeila i le vaega lea o tatou falepuipui, aua o lea foi ua maua lipoti o lea foi sa i ai pagota sa sosola po o ananafi ea po o le Aso Sa. Ia o mea ia e tatau ona silasila i ai ma tau faatelevave le tatou galuega lea aua le malupuipuia, e le gata i le soifua o tagata lautele, ae faapea foi meatotino a tagata lautele.

Lau Afioga i le Fofoga Fetalai, ua tatau lava ona toe aumai se isi tatou vaalele e faalua ai tatou vaalele, aumai se isi vaalele e tau tele teisi atu, aua o lea foi sa i ai mea sa tulai mai, afai e i ai sina mea faaletonu ua le mafai ona lele le vaa lea e tasi, ae lafo atu i lau faasoa lau Afioga i le Minisita, ona e talitonu o mea lava faapenei e fuafua i le seleni. O isi foi vaalele tetele atu, ou

te talitonu e fai foi si taugata o le faagaioiga po o operating costs, ia a o mea ia e silasila i ai e fuafua foi i le maketi. A o lou lena taofi, e tatau foi ona toe faaopopo se isi tatou vaalele.

Lau Afioga i le Fofoga Fetalai, e leai lava se tagata faigaluega e le manaomia se siitaga o totogi, pe galue i le Malo pe galue i le vaega Tumaoti, e manaomia lava ona o le faasoa ia lava aua le tausiga o aiga. Sa ou galue foi au i le Malo, o le vaitaimi sa ou galue ai i le Malo, sa maualuluga totogi o le private sector i lo totogi a le Malo. O lea ua sau sau tausaga, o lea lava ua siisii i luga totogi a le Malo, ma o se lagona fiafia foi lea i le matau atu. Ae sa i ai nai fesili i lou mafaufau ina ua faatulai mai le siitaga lenei ina ua ou tilotilo i le private sector. Ae o lea sa saunoa le Minisita o Tupe, o lea foi sa fesoasoani i ai le Afioga i le Palemia i le faamalalamaina o le tulaga lea, aua o le paaga lea po o faiga paaga a le Malo ma le vaega tumaoti, po o le public sector ma le private sector, masalo po ua 20 tausaga pe a o faatino faiga paaga lea i itu ia e lua, e uunaia ai e le Malo le private sector ina ia latou galulue e unai le tamaoaiga o le atunuu po o le economic growth. O galuega uma ma faiga faavae sa taumafai mai i ia taimi, ae sa tau tilotilo foi lou nei sui usufono, e le gata i le vasaga i totogi i totonu o le Malo, ae faapea foi le vasaga o totogi i le private sector, le aufaipisinisi, o kamupani, o le aufaifaatoaga, o i latou uma o le itu tumaoti a le Malo. A o lea foi sa saunoa le Palemia, o mea ia ua uma ona silasila i ai le Komiti foi lea o lo o faatulagaina totogi a le Malo, le Salaries Tribunal. O lea la ua fuafua faapea, aua e i ai le popolega foi lele, afai ua lelei tele totogi o le isi vaega, pei o le a soloai uma atu agavaa moomia o le isi itu i le isi itu. E faapena foi le isi itu, a maualuluga foi totogi o le private sector ia, ia ua soloai uma agavaa o la e moomia i o i le la itu. Ae peitai, o lea e faalogologo atu ma le totoa, o lo o maintain pea le bearit le tulaga o le fuafua lelei, ina ia aua ne i i ai se tulaga faapena e soloai mai le isi itu i le isi itu ona avea lea ma mea e tau saili ai agavaa. Aua o lea foi sa tau tilotilo atu, ia o lenei foi vaitau, ua tele lava tagatanuu o isi atunuu o lea ua galulue i totonu o le tatou atunuu. Atonu o agavaa moomia ia e le o maua tele i totonu o le tatou atunuu, a o mea uma ia o lea e mataitu e le Malo i le faalogologo atu, e lagona ai le agaga fiafia. E le faapea o i ai se vaega o faatamala ai le silasila pe lape ai le silasila a le Malo. O le siitaga o totogi, e 5% le masina lenei ia Ianuari 2019, 3% ia Ianuari 2020 tausaga fou, 2% Ianuari 2021. Ia, na o nisi o vaega lea e lavea i le siitaga lea e 5% ae faatoa lavea sui usufono i le tausaga fou ma si 2% lea e totoe i le 2021. Ia, o le mea la lau Afioga i le Minisita o Tupe, ia se i silasila ane, Ianuari 2021, pei ua fai si latalata tele i le palota. Aua foi lele lona uiga o le a le maua faamanuiaga e nisi o sui usufono o le a le toe foi mai le 2% lea e tuu atu lava ia Ianuari. Ae silasila ane i lau faasoa, aua o lea ua tele tatou Tulafono ia na e aumaia i le Maota e sii ai lafoga o taumafa suamalie, sii lafoga o tapaa, sii lafoga o ava malosi, sii nisi totogi o auunaga a le Malo, fai lafoga a faifeau. Ia ou te talitonu o lena ua lava le seleni lena ua i ou aao. O le a se tofa? Na ona eu mai lava i le 2% lena eu mai i le 3% i le tausaga fou, 5% Ianuari o le tausaga fou, 5% le masina lenei, paleni mea uma. Ne i te i ua le... Aua ou te alofa atu i lau Afioga ma lena itu o le Maota ne i te i ua le maua na faamanuiaga. A e silasila mai i le itu lenei, e toe foi uma mai lava sui usufono lea e nonofo atu i le itu lenei, e toe foi uma mai lava. Ne i fai fai au siitaga ae e le aeae ai ma lena itu. E pei o le fautuaga alofa lena ne i te i ua outou le maua na faamanuiaga, aua e le gata ma te omai matou toe foi uma mai ae matou omai matou nonofo uma mai i le itu lena.

Lau Afioga i le Fofoga Fetalai, e pei o le tulaga lea o fautuaga ia, na ona faataatia atu, o le a se faatofalaiga a lena foi itu o le Maota, o le Kapeneta e

mafua mai ai mea uma ma faamalagai mai mea lelei aua le atinae o le tatou atunuu.

Ia ona alu alu lea o se matou faamatalaga, ou te manatu o le a seu ia i fanua lou vaa ae sili lau foe, ia manuia le Fono a le atunuu, manuia lau Afioga i le Fofoga Fetalai, manuia le la itu o le Maota faapea foi lenei itu o le malu, ia manuia foi le tapuaiga a Samoa o lo o faafogafoga mai faapea le Aufaigaluega a le Malo. Soifua.

FOFOGA FETALAI: Malo faafetai. Se o miti lelei nei pei ona saunoa i ai le Afioga i le sui usufono. Malo le fautuaga mo le Malo. Ia se i tulai mai le sui usufono mo Gagaemauga Nu.3.

Tofa NAFOITOA TALAIMANU KETI (Gagaemauga Nu.3): E tagamalie a le faafogafoga foi i lenei afiafi, e pau mai foi le talo matua ia e toa ai le moa. E le tau laeia foi i se lauga a Gagaemauga Nu.3 le tumatila o le Maota o le Fonousu a Samoa, aua o paia ua uma ona panini ma faalauatea, o lea ua poto moli i futiafu o le paia o Samoa lea ua lipoi i Tiafau tauave nei.

Lau Afioga i le Fofoga Fetalai, faafetai ua maua se avanoa o Gagaemauga Nu.3 o le muaautasi, o le muaaufaalele, a o le muaautau foi e tua i ai le lauga a Vaituutuu e pei ona i ai tala i le taeao. Ona i ai lea o le lagona, goga ia mamalu ma paia aua o mamalu ua popo, o paia foi ua maea ona aisa, e le toe vaea i sa matou talanoa i lenei afiafi, tulou.

Lau Afioga i le Fofoga Fetalai, o se taimi ona oo lea o se matou talanoa i le auga o aute o lenei aso ma lenei vaiaso, o le Tala Faatatau Faaopoopo Muamua o le Tupe 2018/2019. Ae ua ou lagona ma le loto maualalo i lenei vaega o le afiafi, ae se i ou asia le mauga o Kilepoa lea na faapea ai le tupu o Tavita, talofa, aue, ua maliliu toa, ua maumau ai auupega o le taua. Le sa pele ma faifaimea faatasi. A ou vaai atu i le itu lea o le Maota, talofa, ua na o le pale ua tafea i le auau, ua le see mai ai i ona seetaga malu le faipule o Safotulafai, e paga tutusa ma Vaituutuu aua Salafai ma ona upu. A o le fesili; o fea o i ai le Tofa a Pau Sefo Taumata Pau? O fea o i ai? O le ala lea lau Afioga i le Fofoga Fetalai, i lou tulaga faa-Taitaifono o le Komiti o Tulafono Tumau, Faiga Palota ma Faailoga Taualoa, ou te faaleo ai le agaga maualalo ma le loto faavauvau pe a ou toe manatua lena vaiaso ua sola sa tauaofia ai le Komiti ona o le talanoaina o se Tulafono e pei ona faale ai i le taeao ua sola. O lau fesili; Failautusi, o fea Pau? A o le lagona o le Taitaifono, tasi lea toa manumanu, tasi lea tofa e faamoemoe i ai le Komiti o Tulafono Tumau. E matua le tofa, ae se i faaatoa ai le quorum, se i lauliliu ai le fautuaga ua tuuina mai i le Komiti. O fea nei o i ai? O lele ua segia e le tufuga pule ma le mataisau o mea uma. Ona i ai lea o se matou vaivaiga, a o faafogafoga mai le tausi ia Ana ma le aiga faavauvau, matou te faapea atu, faamaise le agaga filemu o le Atua aua o le agaga e malu, e maua ai le toafimalie. Utu laia ia Keriso outou loifofoga faanoanoa, talofa, ia maua le mafanafana o Keriso i ona aao e apelepele ai le agai i luma. Tafimala lau faigamalaga oe le uso, e manatua pea e le tatou Komiti, ia maua sou nofoaga mau i le lagi. Talosia ia aua nei mafuli a puou le faigamalaga, ae aua foi nei sola o le sola a le manuma, a ia pau se toa toe tulai se toa, aua le faaauuina o le galuega i le tausiga o le aiga, o le nuu faapea le itumalo ma le Malo ma ona tagata.

Lau Afioga i le Fofoga Fetalai, ona ou oo mai lea i le tulaga o le Tala Faatatau o le Tupe Faaopoopo Muamua, e fia faailoa le agaga faamalo ma le agaga faafetai o lenei itumalo. A matou vaavaai ma le totoa i tapenaga na faavae ai le Tala Faatatau Faaopoopo Muamua, o lo o faavae i se upu

faapea, o tapenaga sa õfilifili ma le to'aõ, the right path. Ona agai lea o sa matou vaavaai i tulaga o lo o faasoa ai le Tala Faatatau Faaopoopo o le Tupe. E momoli atu le faamalo ma le faafetai, o lo o agai lava i le tulaga o le ave o le faamuamua i le galuega e fia vave faatino. Malo. A mea o le aute lena o faigamea. O lea ua e agai lau Afioga i le Minisita i le tulaga o le faamuamua o le tau i tagata faigaluega po o latou totonu ia siitia. Se malo faafetai. O tala a lena itumalo, a mea o le agaga maualuga lea. O fea lava tatou te agai i ai, o le tau i le galue a le tagata o le mea sili lea. O le mea lea i lau Afioga i le Minisita o Tupe, matou te momoli atu le faafetai. Ua saunoa se tasi o sui usufono, o lea ua faavasega i ni vaega se tolu, o Ianuari o le tausaga nei, o Ianuari o le tausaga 2020 ma Ianuari o le tausaga 2021. E atagia ai le faasoasoa i le filifili ma le toa, the right path aua foi o lea e ave le faamuamua i nisi o atinae tetele a le Malo. Na pau lava si popolega laitiiti i i lau Afioga i le Minisita, e pei o lea ua foliga mai ua aafia ai i totonu ma le totonu o lisi ua tuai ona totonu. Sa i ai le faamoemoe o lou sui usufono, ave pea le faamuamua o le Tala o le Tupe Faaopoopo Muamua i le agaga o lo o fia faatino ai galuega e fia faamuamua a le Malo, e lagolago i ai o matou itumalo. Afai la o lea e aafia ai i le Tala ato lea o le Tupe le tulaga o le toe tau totonu o lisi tuai.

Ona oo mai lea o sau faamatalaga lau Afioga i le Fofoga Fetalai i le Matagaluega o le Fono Aoaofaitulafono, e matau atu ma le totoa, e \$284,900. O le faamoemoe o lea seleni tele, e toe totonu ai Tuanaimato e tau ia Iuni. A o le tautaulama lea e tau avatu i luma o lau Afioga faapea foi le Faatonu Sili ma le Matagaluega, o le taimi lea ua i ai nei lea ua sui mai ai le Matagaluega, le Ofisa o le Fono Aoaofaitulafono i Mulinuu. Lau Afioga, e fai si tele o mea e fia faalelei, a o le tautuaina foi o le Fono, o lea e tu le loma aua le faaulufaleina o le tatou Maota manaia, a o le faalavelave, o lea e tausaili po o fea se fale a o fea se maota e tua i ai sui usufono mamalu o le Maota pe a oo i le taimi e malolo ai, ua le toe i ai se Luafatasaga. O le agaga lena o lea e tau avatu i ai le faamuamua a lau Afioga, a oo ina malolo ma faaoga le tatou Maota, ia o le matou tatalo lena, se i silasila ane. O le naunautai lava o le sui usufono mo Gagaemauga Nu.3, o maota ia, o maota e fitoitonu i le Malo, e le tau faamoemoe e fau mai ni fesoasoani mai fafo, a o le mea lea e tatau ona ifo tonu lava le fuini i le lapalapa, o le maota e fau mai outou aao ma o matou lima, e filitagaga ai ona upufai. O le agaga lea o lea matou te faoololomaau atu ai....

FOFOGA FETALAI: Malie le sui usufono lea e saunoa se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, e sili le tuutuu mai i totonu o le saunoaga a le sui mamalu. O mea faapea e taua lava lou finagalo, i le mea lea o le faatupe e tatou o a tatou lava galuega. E pei lava o oe le isi sui usufono e faapea atu e totonu lafoga uma le isi vaega ae fai mai e aua, o le mea lena o lea e taumafai i ai lo tatou Malo. O se luma le fai o o tatou fale e nisi i fafo. Ae e faapea le mea o le faautautaga tatau. E saili saili saili, a le lava loa a tatou tupe, le augatata o tagata e totonu a latou lafoga. Ona tatou agai lea i nisi auala, ae tautuaina foi ma oe a fai a tatou tulafono, ia e lagolago mai o oe o le sui Fofoga Fetalai.

FOFOGA FETALAI: Tulai mai le sui usufono e faaauu le saunoaga.

Tofa NAFOITOA TALAIMANU KETI: E taua le fautua a lau Afioga le Palemia, e taua tele i lenei itumalo. Ao motugaafa e faatupu manatu, e faatupu lagona, ae e le po malae i lau Afioga i le Palemia faafetai. O lea matou te tautaulenu ai, sei toe silasila ane lava. E tele mea e toe fia faaleleia o le tatou fale lea ua see atu i ai le Ofisa o le Fono. E omia i le tele o potu, ao le talosaga, o la e avanoa pe ana faapea e agai le NPO...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, o la o lo o i ai le fuafuaga a lo tatou Malo mo le fausia o le fale tele e tautua ai le fale lea. Ana fai ma e afio mai ta te talatalanoa, manatua foi o au o le Minisita o le Matagaluega. Ou te le o vaai lava ia oe, o e fealuai fealuai lava ma e sau fesili. E faapena le mea e fai ma e oo mai e te fesili mai po o a mea a lo tatou Matagaluega o lo o fai, ona ou tau atua lea. Sei vaai i ai toeitiiti a pau le fale nei i le tele o lou leo. Ae tau tutu mai lou fatu i i le mea lea e taumafai le Malo e fai.

Tofa NAFOITOA TALAIMANU KETI: O lea la ua maua faafetai. O le agaga lava e oloolo pito vaa, tatou te galulue faatasi. Afai o lea o lenei ua tapena, ia faafetai tele i lau afioga.

Ona see mai lea o se matou talanoa i le tulaga o le tamaoaiga o le Samoa ma lona atinae. E faaluaina faatoluina le agaga faamalo ma le faafetai i le tulaga o le tatou malaevaalele. E matua lagolagoina e le motu o Salafai ia fuafuaga uma, aua e faigofie mo matou. Ia sagai ane ai o le tai, e lagolagoina foi e lenei itumalo, le i ai o se isi a tatou vaalele, e fesoasoani ia i tatou ma le tau atinaeina ma le femalagai o le atunuu. Lau Afioga i le Minisita o Pulega o Uafu ma Taulaga, matou te toe tatalo atu. O le sootaga lava lea e tasi ma i matou i Salafai ma le malaevaalele, sei toe silasila ane lava, sei toe faalelei le tulaga o tatou vaa. O le mea lea ou te vaai i ai, ou te malaga i vaiaso uma lava, Aso Faraile sau i le Aso Gafua, aso uma vaiaso uma. O le agaga lea e taumafai atu ai, e foliga ua toe see i tua le auaunaga, tulaga o taavale a silasila i ai lau Afioga i le Minisita, e oo loa i le taimi o le a tuta le vaa, e o mai uma lava tagata o le pasese. Ae o le mea tatau sa sau ai e na o avetaavale, silasila la i le va o taavale, e olo ai lava ato i luga. E naunau foi le mamalu o le atunuu e fia oo, e fia muamua i le pasi. Ae afaina ai mea totino e ese le fou e taugata e tai selau afe taavale. E tatau lava ona nonofo pea i luga ae na o avetaavale i lalo sei agai. E pei ole agaga lea o se matou taumafai atu, leaga o lea matou te malaga i masina uma ma vaiaso uma. Ae sei toe silasila ane i ai lau afioga. O le sootaga lea o matou ma le malaevaalele faapea le taulaga, ina ia toe faalelei pe a tusa ma le faaso.

Susuga Hon Papaliitele Niko Lee Hang: Lau Afioga i le Fofoga Fetalai.

FOFOGA FETALAI: Sei tulai mai le Minisita o Galuega.

Susuga Hon Papaliitele Niko Lee Hang: Lau Afioga i le Fofoga Fetalai, ou te tulai atu ona ua laga mai le mataupu lea i vaa. Vaa ia e faaoga i femalagaiga i Mulifanua ma Salelologa. Ua silafia e le sui mamalu o lea e tapena le isi vaa faaopoopo i Savaii. O le vaa lea e tapena e tele atu i lo le vaa lea e faaogaina nei. E tele le pasese toe tele taavale e mafai ona ave ai. Ae o lea e tapena le fuafuaga lea, masalo e le o toe mamao mo se isi vaa e lua ai vaa mo Salafai. Ao le tulaga lea e saunoa ai, i le omia o le pasese i lalo i le

mea e i ai taavale. E alu lava le vaa ae fai faasalalauga a le vaa. O pasese uma e affio i luga, ao taavale e i lalo, ae pau lava o le mamalu o lo tatou atunuu e le usitai i faasalalauga aua le puipuiga mo i latou e ala ai ona faasalalau ia mea. E fai lava faasalalauga lea i taimi e tuua ai le vaa po o Mulifanua po o Salelologa. Ae paga lea, pe na te saunoa e vave ona oo i fafo e tuli le pasi, ae faapefea le omia i taavale pe a.....o tatou e tataua ona tatou fautua i tagata, le mamalu o le atunuu. O la lava e folafola mai e le kapeteni o le vaa, faamolemole le pasese e agai mai i luga mo le puipuiga la lea. E pau lava o le le usitai lava o tagata na e mafua ai le tulaga lea. Ao la e faasalalau lava le tulaga lea, aua le puipuiga o le mamalu o le atunuu o lo o feoai ma faaaoaga o tatou vaa. Ma le faaaloalo lava.

FOFOGA FETALAI: Malo faafetai, tulai mai

Tofa NAFOITOA TALAIMANU KETI: Faafetai o lea ua manino le saunoaga a lau afioga. E sao lele lava e le faigofie le mamalu o le atunuu. Ae peitai o lea mea sa i ai muamua i le faatoa aveina atu o le vaa lea, sa mafai lava ona taofi i luma le mamalu o le atunuu sei faasee muamua taavale e le aufaigaluega. E na ona tuualalo atu faapena i le atinaega o lo tatou atunuu lautele, ia agai pea i luma ae aua le fai ma solomuli i tua e pei ona matauina e matou e malaga i Savaii i vaiaso uma. Ao i ai pea lau afioga i le Minisita o Galuega, ou te talosagaina ma le agaga faaaloalo e ui lava e le o le avanoa leni. Ae ua maea ona fofola i luma o lau afioga talu ona tulai mai i le tofi.

Lou nuu o Safai ma Satoalepai e le o ni auala galue o lo o talosagaina. O auala lava i totonu o le afioaga. Ua fai si leva na afaina, o lea ou te toe talosaga atu ai, tuualalo ai i lau afioga ma talosagaina lau afioga, sei toe silasila ane lava i talosaga a matou nuu. O le faiga faavae a lo tatou malo ma le tatou HRPP ave le faamuamua i mea o lo o i ai malumalu ma aoga. A silasila la i auala ia e i totonu o nuu ia, o lo o i ai ma le mataaga o le Laumei. Ona o lea sa ou matauina i taimi o asiasiga o aso fiafia, i le tele o le au matamata mai fafo. Ae o le agaga lena o le faaletonu o le auala. E na ona tuutuu atu i autafa o lau afioga i lau faasoaga. O lea ou te talitonu sa saunoa lau afioga i tulaga o le faasoaina o auala, ae e le o ni auala galue o auala i totonu o afioaga.

Ona ou oo mai lea i le Ofisa o Aoga.

FOFOGA FETALAI: Malo, e faamanatu atu i le sui usufono toe lua au minute faai mai lau saunoaga.

Tofa NAFOITOA TALAIMANU KETI: Talafeagai lau afioga. Matou te momoli atu le faafetai tele i lau Afioaga i le Minisita o Aoga, o lea ua matou maua o lea o le a tapena le malae. Masalo o lea sa silasila i ai le Palemia ma le Minisita o Tupe, se faleaoga ina a matagofie o Laumoliafi i Avao, e pau lava lea o le faamoemoe, ae o lea ua ou maua e momoli atu le faafetai tele. E toe lava o le malie o le Minisita o tupe i le tender lea e fai, maua loa le konekarate latou te faia. Ao la e faafogafoga mai lo matou nuu, ma lo matou itumalo, momoli aloaia atu i luma o le Maota leni le faafetai tele i lau afioga i le toetaufanua a le Malietoa. Faafetai le manatu atu i lo matou nofonono mai i Salafai. Ona faamuliai lea o sa matou tala ona o lea ua maea lo matou taimi.

Lato i le ea ma le lato i le ala lau Afioaga i le Minisita o Faatoaga ma Faigafaiva, na ona matou toe tuutuu atu la tatou talanoaga i le tilapia. Ae faapea le limu lea ua sosolo i aau. E pau lava lea o le mea e ola ai Matautu. |O

le vao o la e sopo le tualava ma le gataifale o la e sosolo ai le limu. O lea matou te talitali mai po o afea e afio atu ai le Matagaluega o Faigafaiva, sei tofu ma matou o e fesoasoani ae sei tau tae le limu ae sei faatupu tamai ia, aua le tamaoaiga ma le fofoga taumafa o le itumalo.

E le tauoo se matou talanoa i le tulaga o le penisione, i le tulaga o matou lea e malaga. Sa saunoa se tasi o sui usufono, ae ua ou manatu o lea ua matagofie le faalamalamalama a le Malo o lea e agai i luma o le a silasila i ai.

Foi mai sa matou tala, lau Afioga i le Fofoga Fetalai, faafetai mo lo matou avanoa, malo le faatoatoa malo foi le onosai i le faafoefoeina o le Fonousu a lo tatou atunuu. Manuia le tapuaiga i lo tatou Malo faapea foi le isi itu lea o le Maota ae matou maloloina i le alofa o le Alii faafetai.

FOFOGA FETALAI: Malo faafetai i lau afioga i le Sui Fofoga Fetalai. Ou te tapa le Taitaifono o le Komiti o Tupe.

Malie lava le sui usufono o Alataua i Sisifo sei tulai mai le sui usufono mo Faleata i Sisifo, atonu e le umi sona finagalo, aua o Minisita lagolago.

Tofa LEALAILEPULE RIMONI AIAFI (Faleata i Sisifo): Faafetai i lau Afioga i le Fofoga Fetalai mo le avanoa. O lea e tau matau atu o lea ua tau see loa le sa o lau afioga ao lea e le i ave atua ni finagalo o lenei itumalo.

E taua tele le Tala o le Tupe, na ou sau nei i le afiafi valaau mai lou tina, "Manuia le Fonotaga Leala, o le a ou faalogologo atu". Ou fai atu, "Mama ki faaleo tele lau laau ma fai i le toaina e soso ane i talaane o le leitio", ou te alu atu loa ou lauga. Ou fai atu i le loomatua, "Vaai oe mama, faafetai i le Atua faafetai i le itumalo, aumai le avanoa i lau tama e lotolotoi ai i upufai o Samoa". O le tagata e sau i inei i totonu o le Palemene ae le faaaogaina le avanoa, ua matua maumau le taimi na ave ai e lona itumalo ma le meaalofa a le Atua e sau. Leaga na o tatou lava a lauga e faamaumau i totonu o faamaumauga a Samoa e oo i le faavavau. Ma o i e toe saili mai ai le tofa i e fai mai, pe faapefea le tofa sa i ai tatou, leaga o upu nei e faaoga e taua, aua le atinae o le atunuu faifaipea. Aua o tatou o lo o i ai le taitaiga o Samoa i lenei vaitaimi. O lea lau Afioga i le Fofoga Fetalai, faafetai mo le avanoa. E fia pai foi se faamaisega i le sui usufono, se tasi o toa manumanu o lenei Maota. I le faletua ia Ana ma le paia i le itumalo, faamaisa le Atua, e tasi lea tagata taua ua iloga lona sao. E le gata i le atunuu aemaise o lona taumafai mai i le Palemene. Ua fia tausaga o taumafai mai, malo faiaina malo faiaina. Malo mai ae paga lea ua le maea lana Paeaiga muamua ae faafetai. E le taua le umi na ola ae o au galuega sa fai. Faafetai ia manuia lau malaga. E le tau faafetaia le Malo i le galuega lelei o lea tausaga, ae ave atu le faamalo ma le faamalosia ma le faamanuia i lenei tausaga i galuega o le a feagai ai. O le Tala o le Tupe ua feagai ma i tatou, o lau tala lava lea e fai soo i le taimi e talanoa ai le Tala o le Tupe, tatou faafetai o lo o tatou o mai e faasoa tupe, maua tupe faasoa aua le atinae o Samoa. Tatou vaai i le atunuu e sili ona milionea i le lalolagi o Amerika. E lua totogi... o isi tagata faigaluega a le Malo e ova i le milionea e leai ni totogi o maua. Tauaimisa le au polokiki ae le totogia tagata faigaluega, afaina ai atunuu. Ae a tatou, maua le filemu ola fiafia ola saoloto, maua tupe faasoa. E lagolago le Tala o le tupe ae ave atu le tuualalo i le paia o Minisita.

Lau Afioga i le Minisita o Galuega, ia malo galue, faafetai mo le seleni lea ua tafa lou finagalo aua lo matou nuu i Vaigaga. Ua leva tele ona talosagaina se seleni aua lea pa, ae faafetai o lea ua finagalo lau Afioga ma le Tamaitai Pule i lea vaegatupe laitiiti e \$25,000. Faafetai, faafetai tele. O lea sa

fesoasoani mai foi si ou uso o Faumuina, ia leaga o le ma itumalo faifaatasi, lea o le a alu ai i le palota i le isi Paeaiga lea e lumanai nei.

A o tulaga i tatou auala, i lou talitonuga lau Afioga, e tatau ona toe fai se iloiloga auiliili, ua tatau ona toe faalatele le tele o tatou auala, ua fai si vaiti o auala, main roads uma lava, aemaise le alu i tua ma taamilo i Savaii. Sa talafeagai lava i le taimi o laiti taavale ma toagaogao, a o le taimi lenei ou te talitonu ua tatau ona toe tagai i ai lau Afioga, aemaise la o mea o edges o auala, ou te talitonu o le vaega aupito sili lea ona tatau ona ave i ai se faamuamua, aemaise auala fou o lo o fausia nei, aua a e tagai i auala, e amata ona leaga mai tua, e taetae mai le pito i tua, ona sau ai lea agai i totonu. Se i vagana auala ia ua fai mai foot paths, o auala ia e umi ona last. Ae manaia pe a toe tagai i ai lau Afioga i le faatinoga o auala agai i luma. E le gata i lea, o le vaega lea e tipia le auala i le vai, faamolemole, se i fai se tou fetuunaiga. A tipi nei le auala, o se auala matagofie, e fia masina, o isi... o le auala lea a maua ma Levaopolo, ma Olo, e fia masina o tipi ona ou oo lea i le Tamaitai Pule lea e avatu ai le fesoasoani, lea e i ai le fetuunaiga lea e tipi e le vai toe fai e latou. O lou talitonuga lau Afioga, toe iloilo, o lena e tofu lava vaega o auala nei ma vaega latou te maintain ina. O le a le mea e le ave ai i le vaega lena latou te faia, aua o latou foi lena e maintain ina, tipi e latou ma maintain e latou, aua e pei e mumusu le vaega lea e maintain le vaega lea, aua o lea e tipi e le SWA. Ae manaia pe a fai e le vaega lea e faigofie ona fai. E i ai se mea o faaletonu lau Afioga i le Minisita?

FOFOGA FETALAI: Malie le sui usufono o lea ua tulai mai le Minisita mo Galuega.

Susuga Hon Papaliitele Niko Lee Hang: Lau Afioga i le Fofoga Fetalai, leai na o se fesoasoani i le saunoaga a le Afioga i le Minisita Lagolago, i le tulaga lea o le galuega lea e tipi ai le aualatele aua le taiga o se paipa mo le suavai taumafa, o la ua i ai fuafuaga, e totogi e le tagata lea e ana le galuega le tupe i le Ofisa o le Vai. O le Ofisa la o le Vai e fesootai ma le konekarate, o le tulaga lea e i ai a uma loa ona tipi ua uma ona toe faalelei le paipa, ua toe faatumu le auala i le tulaga sa i ai. A o le maitau lea e faapea, o le fesootaiga la a le Pulega o le Suavai ma le konekarate lea e mafua ai ona tuai. Ae moni le saunoaga o le tele o mea faapea, o le tuai ia ona faatino. A o le mea lea e taumafai i ai ina ia vave ona toe faatumu le auala ona e afaina ai taavale e soli soli lava ma tele le pu ma afaina ai lava ma le auala. Ia a o le tulaga lea e pei ona silafia e le Afioga i le sui usufono mamalu. Faafetai.

FOFOGA FETALAI: Malo faafetai.

Tofa LEALAILEPULE RIMONI AIAFI: Lau Afioga, faafetai. Lau Afioga o lea e malamalama lelei lava i le fetuunaiga lea e i ai nei, a o lau tuualalo lea e tuu atu i lau Afioga, e manaia sao aua o lea e totogi e tagata le tipiga o le auala, ae tuai le faatinoga a o lea e manaia le faatino e le vaega lea e maintain ina, e mafai ona fai e latou aua o lea e galulue i aso uma ma toe faatumu. Ae tuu atu pea i lau Afioga.

O le auala lea lau Afioga e alu i le malae vaalele, o i lava e tatau ona ave i ai le tatou faamuamua ona o lea e aupito sili ona tele le faaaoaga i aso uma. E le o po se lilo faafetai o lea ua avatu le galuega a le Malo e faalatele. Faafetai. Ae tatau la ona tagai i le auala lea e oso i Aleisa, e tele le faaletonu, sa tatau ona upgrade le auala lea, a o lea e feagai le auala lea i tai ma le faaleleia, aemaise

le oso atu lea i totonu o Falelauniu i le auala alo lea e oso atu i ina e alu i Aleisa, o le auala pito sili lava lena ona lelei ma faigofie ma televave ai le omai o uta ma le o atu o tai, a ua fai si leva o tuulafoai le auala lea, se faamolemole se i toe tagai ane i ai e ave i ai le faamuamua ma auala uma ia i Falelauniu aua e fua i le aofai o tagata o lo o nonofo ai ma faaaogaina, e fai si tele o tagata e nonofo ai, a ua tuai na faagaoioi faamolemole pe a uma taaloga ia tatou te alo atu i ai.

O le isi vaega, na o le fautuaga, o mea ia o taxis. A e agai nei i tua o le flea market, ua le mafai ona feoi tagata ma pasi ma mea i le tele o taxis la e tutu ai ma feoi ai. Sa ou faapea i le Tulafono foi lea, e tataua ona o uma taxis e tutu i taxi stand, tasi le Tulafono mo tagata uma. Ae o lea e foliga mai e ese taxis e tutu i stands ese taxis e feoi solo ma faalavelave solo. E faigata foi la, o le mea foi la lena o lea e tutupu ai faalavelave i tagata ia e o i taxis ma leiloloa a latou meatotino, ma tutupu ai faalavelave ae fiu e sue taxis ia ona e le o tu i se stand. A o le taxi lava ia e alu atu i le stand e faigofie foi ona toe trace mai i ai, e sue mai ai pe a i ai se faaletonu. O lea la fai mai nai tama ia e fai a latou stand ua le iloa e latou po o fea tonu le faamamaluina o le Tulafono, ona o lea e faataga isi e omai e petolo solo, e oo i lalo o le fale o le Malo, ia a ta alu atu i ina i le pisi o le fale o le Malo i lenei taimi e tau leai ni car park, e lelei pe a ua aveese taxis na e fai foi la latou car park i ina. Tagai ane i ai lau Afioga mo le agai i luma.

O i i le MNRE lau Afioga i le Sui Palemia, muamua a, a tatou toe usu mai i le taeao ona e tagai lea i faleie na e faafesagai ma Eveni, ua fai si mataga tele o lea vaega, o lea ua uma ona saunia lelei e le Malo maketi lelei, le flea market ma le maketi e o lelei tagata e faatau ai a latou oloa a ua matauina e i ai lava tagata na na faatau i ina, a e tagai la i ai o lena ua i faleie o la ua malepelepe, ona o atu lea faatau i ina, ua oo i luma o le NPF plaza, ua oo lava i fai o faatau ai. Faamolemole e tataua ona fai se fuafuaga, e le matagofie ia vaega, ma se i ave tagata e faaoga mea na fai e le tatou Malo e faatau lelei ai a latou oloa.

O le isi vaega, o tatou vaitafe, pe le mafai e le Matagaluega ona fai se galuega faifaipea i le faamamaina o vaitafe, aua a oo i le taimi lenei o timuga o le mea lea e faigofie ona pa i luga vai ma lolovaia, ona e le o i ai se galuega foi lea e taumafai e faamama ma faaloloto alava ma vaitafe o lea e toa ai le oneone i taimi uma, pe mafai ona i ai se tulaga i le vaega lea, aua ou te talitonu foi e mafai ona fai fua. E tele kamupani fai auala, fai konekarate e manao i le oneone, ae ave i se tau e fai fua e latou ma faamama e latou i se tau talafeagai.

O le Matagaluega o Leoleo, malo faafetai. Ua tele le saogalemu i le kerisimasi o le galuega lea a leoleo i auala. Ae toe lagolagoina le finagalo o se tasi o sui usufono sa saunua i lenei aso i le tele o faalavelave matuia lea ua tulai mai, tele le faaletonu, fasioti tagata ia ua tulai mai. Sa ou talanoa i le Afioga i le Komesina, aua o lea ou te talitonu, e tele le masalosaloga o tagata nei i mea ia o fualaa faasaina, avatu i ai lau fautuaga, maua loa suspect, i le taimi lenei, tui le toto. Ave le toto e sue, aua po o le a le faaaogaina o le aisa i le tolu, ono masina talu ai, e maua uma lava i totonu. A ua tataua ona faataunuu lea vaega, aua e fai atu lau tala, o le matua faafitauli ogaoga lea ua i inei i Samoa, o le mea lea. Ia matua tagai lelei ma auiliili i ai po o le a se faasalaga talafeagai e fai i le mea lenei, ave i ai le faamuamua. O lea e fai i atunuu Asia tagata faapenei, e faasala oti. Aua o se mea aupito sili ona leaga, e aafia ai tupulaga o se atunuu.

O le isi vaega, o tamaiti ia e i ai nei, o le tele o tamaiti e matua tautalaiti, le mafaufau vaeane le faafofoga a Samoa, a sau e faatau mai se mea ia oe, a fai atu e leai, ua aisi loa. A o le isi taimi, e ta lava le 10 i le 11 i le po, o la e feoai lava i le taulaga. O tatou i aso ia ma mea sa tatou faatau, o mea sa fai i totonu o aiga, o mea la e maua i lafanua ma le sami. Ae leaga o mea ia ua faatau nei, o mea ia e aumai fale o Saina ma isi kamupani ma omai faatau, e le talafeagai la, ua tataua ona i ai se curfew, e tataua ona i ai se sa, ta le lima i le afiafi ua le tataua ona toe maua ni tamaiti laiti faapea i le taulaga. Ma i se common sense, e le tataua ona... ina ia aveese atu ma tatou lea vaega, ua eseese tupulaga, eseese tamaiti, eseese lenei vaitaimi. A outou vaai i ai i nai tamaiti ia e faatau ula mai Tufulele, o le mea lea ua trademark mai lava i le afioaga lea, na ola mai lava tupulaga ma augatupulaga o latou faia le mea lea, e oo mai le aso, e ese le matagofie ma le manaia o lea mea, ma e faaalalo foi tagata nei. O le mea la lena o lea e encourage e tatou, a o le mea la lea ua fai nei e le toatele, faamolemole lau Afioga toe tagai ifo i le vaega lea. Faafetai tele lava i le Matagaluega o Leoleo, o lea ua aumai le Tulafono lea o tagata e faafoi mai fafo, o pagota. Malo lava faafetai, o le mea lea ua leva ona tataua ona tapena i ai ma tuuina mai, ua fai si toatele o i latou ua faafoi mai, ae tataua ona tagai pea i ai, aua o le tele o nei tagata, pe na o se tai lua i le taitolu tausaga na fanau ai i Samoa o loa i fafo i le 20 i le 30 tausaga, a o lea ua toe faafoi mai. Manatua la o la e i ai le finauga foi lea faapea leaga o le atunuu na fanau ai, ae tataua foi ona i ai se tatou malosia e tetea atu ai ia vaega e fai ma tatou tilotilo i ai, aua e i ai soligatulafono na tulai mai nei, o lea na tatou vaai e mafua mai tagata nei mai fafo.

Lau Afioga i le Minisita mo Faamasinoga, se i tagai ane i faasalaga talafeagai mo solitulafono mamafa. Ae fia oo sau tala i mea ia o tatou faamasino, fua foi la i le Tulafono na aumai e le i mamao atu lea e tapulaa ai tausaga i le 68 i le 70 pe a maua le malosia, ia se i toe tagatagai i ai. Aua o lea tatou te vaavaai i ai, o le taimi lea o lava le tomai ma o lo o lava foi le malosia e faaaau ai, aemaise o lena ua i ai le fuafuaga a lo tatou Malo i se tatou Court of Appeal e manaia foi ae faaoga i ai i latou ia ua iu mai tai, e manaia ae faasolo i ai, e i ai latou ia tatou faamasino ua iu mai fafo ua foi mai fafo i atunuu tetele o la e lava le tomai ma le malosia e faaoga i ai i ia vaega. Ona oo mai lea lau Afioga i le Matagaluega o Aoga, e le tau fai atua sau tala aua ma te mafuta pea ma ma talatalanoa i le tele o aso ma ou faasoa foi i mea ia. Ia, lau Afioga i le Minisita ma le Minisita Lagolago, ia faaoga mea lelei ia na lua maua mai ia Faumui lena ua lua lelei ai. Ae na pau lava le mea lea ou te fia avatu ai le fautuaga, o lea ou te faitau nei i le review fou lea o le tou sector plan lea na fai i le 2013-2018, o le mea aupito sili ona ogaoga lea e sau i le fautuaga ma le mea lea na maua, tele le faaletonu i le history rate. O le mea lea na mimita ai Samoa i aso ia, leaga toetiiti lava oo i le 100%. A o le mea lea ua sau nei i le lipoti, ua matua tele le faaletonu. Igilisi, Numera e oo lava i le faa-Samoa, lau Afioga, ia ave i ai se faamuamua i lea vaega.

O le mea lea i le SQA, talu lava ona aumai le SQA, ou sau faitio i ai, ou te le faitio i le SQA leaga e aoga le latou role, ae o lou talitonuga, pei lava o lena e sese le latou role le latou mandate. Pei o lea ua omai e taumafai e regulate luga i post secondary. E tataua ona amata i lalo. O le a le aoga e toe o ai i luga i faailoga ma mea ia, o lalo le mea e tataua ona tilotilo i ai? Manaia pe a omai e extend le latou mandate, amata i Pre School, Primary School, o i ina e tataua ona ave i ai le faamuamua lau Afioga. O lea ua ou sau ma le igoa fou o le SQA, ae a pe a tuu i ai le SQEA, e le o le Samoa Qualification, a o le Samoa

Quality Education Authority. Lau moi lava lau Afioga i le Minisita, ona o ifo loa lea e amata le vaavaaiga mai lalo.

FOFOGA FETALAI: Toe lua minute o le sui usufono.

Tofa LEALAILEPULE RIMONI AIAFI: Aua o le mea lea e tupu nei, o tatou foi isi tagata ia e tuuaia nei, tatou sui usufono. O lea tatou te mananao e fai lea college i i, faa-college i, leaga o le mandate lea na sau ai. A o le tele o nei colleges, e le meet ina standards, minimum standards, e tatau ona avea ai ma kolisi, leai ni library, leai ni labs, leai ni faiaoga, ia ona tau lea o le kolisi tau ina tau o le kolisi a le itumalo, ae talofa. O le vaega la lea a le SQA, o i latou ia e tatau ona tilotilo i standards ma vaega ia ina ia mafai ai ona agavaa se aoga i ia vaega.

Lau Afioga, faafetai mo le avanoa ua tuuina mai. E tele mea ae ua ta alofa i lou oi oi mai. Ae faauma atu ai se faamatalaga e faapea; ona o lea e maua pea i saunoaga a lo tatou Malo. O le mea ia manatua e le toatele o sui usufono, o Samoa lava ia i le vaai mai a le lalolagi o se atunuu filemu toe saoloto. O lona uiga o lau tala, a fia tetee, tetee, faataga e o e tetee. E leai se pa puipui. O faiga foi faasolitulafono i totonu o ofisa, totonu o galuega ma mea fai a le Malo, e le mafai ona taofia e tatou, aua e maua i so o se atunuu uma o le lalolagi. Na pau le galuega a le Malo lea e fai, ia taatia i vaega uma ofisa ma itutino e vaaia ma malupuipua mea tutupu mai. O isi foi taimi ua ou le fiafia i le tele o vaega e vaavaaia mea nei, ua i ai le Ombudsman, ua i ai le Faamasinoga, o Leoleo, o le Audit, o mea uma ia a tatou o lea e faatino, ma e leai foi se papuipui e taofi ai so o se sui ma so o se tagata sitiseni o le atunuu e molia nisi o i ai se solitulafono. E maua le avanoa mo soo se tagata, e maua le avanoa e so o se tagata. O le ala lea o lou talanoa atu, e faafetai ai i lo tatou saolotoga o i ai, ma le filemu o i ai lo tatou atunuu.

E momoli atu le faafetai ia outou afioga i Minisita le faamalosi i lenei tausaga i la tatou savaliga. O lea ou te nofo ma ou vaavaai atu i le pito i tua, ma ou musumusu ia Lenatai. A ou vaai i le laina atoa lea ona ou alofa lea, a ou vaai atu i tua ia Loau, na oo mai o uliuli lelei lona ao, ao lea ua amata ona paepae ma. E tasi lava le Minisita lea e uliuli atoa lona ao, na o Afamasaga, lau Minisita. O lona uiga e na o au lava le Minisita lagolago lelei lea e i ai. Manuia le Fonousu a Samoa.

FOFOGA FETALAI: Malo faafetai, atonu e le umi le saunoaga a le sui usufono mo Anoamaa. O le toe saunoaga foi lea a lea itu o le Maota.

Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU (Anoamaa): Taoto ia paia ma sa o Samoa ua uma ona oo oo i ai ia saunoaga o lenei aso atoa foi ma le aso ananafi. E talitonu e le toe faaopoopoa pe toesea i sa matou tala. O paia lava ua taoto ae o se ala ua oo, e le faoa foi pe toesea.

Ae avea ia lenei avanoa matagofie, sei fai ai foi sina sao o lenei itumalo aua le faamoemoe ua lupe nei i le Laulau a fono, o le talanoaina lea o le Tala Faaopoopo o le Tupe. O lau lava matamata aoatetele i le Tala o le Tupe, se e laitiiti ae ganea, e laitiiti ae u'a mea e sau ai. E faatoa pau lenei o se Tala o se Tupe ua malie ai le agaga ma le mafaufau. A fua i ai i mea tetele ia e i ai, ia faamanuiaina ai o tatou tagata. Ua leva foi ona o matou tatalo, a maua faamaumauga sa ou tatalo ia sii totogi o tagata faigaluega, ae o lea ua sau le tali. Ou te le o popole la i le Tribunal po o nisi tagata i le tuanai. Ao le ai lea o

le faigamalo lenei, o le tatou ai lea mo Samoa. Ua leva ona i ai totogi i le sefulu tausaga, o le mea lava e tasi. O lea ua aumai le tofa, faafetai i le tofa, faamalo i le Malo. Faafetai foi o lea ua amanaia le tautua a i latou o lo o tautua i le ao ma le po aua se manuia o lo tatou atunuu. E moni lava o tatou e fai tonu, ae pei o latou nei e pau i ai le mamafa o le faamoemoe. O lea foi e manaia nai vaega ia e aumai ia tuu faamulimuli tatou. Ae faamuamua ia tagata faigaluega aua le faamanuiaga lea. Ua faamanuiaina tagata matutua, faamanuiaina faiaoga, vaai i le tele o le anoano o le mea lea e sau i le Tala o le Tupe. Ua faamanuiaina e e sii mai i fafo, ou te le iloa la po o a faiga faavae ia e aumai o lea e faaletonu faiga faavae a le Malo. E leai o i lea e atagia ai le lelei ona faafoe o le Malo. A silasila i faiga faavae ma le tau sosofa mai fai mai ua faaletonu. Se e tali lava le atunuu. O lea faatoa uma atu nei la tatou faiga palota, o le a le tali a Samoa, o i ina e iloa ia, o lea lava e sao lelei le tulaga o lea e aga i ai lo tatou sa ma le faamoemoe.

E momoli atu le agaga faafetai i lau Afioga i le Minisita, ae faapea le aumaiga o lenei Tala o le Tupe, ua tatou fialia uma ai, ma tatou faafetai ai. E pau lava lea ua fai ma masani o tagitagi a o tatou itumalo e aumai. E le natia foi i tua, e leai e momoli atu i luma. Ou te lei talanoa, leaga o lea faatoa uma atu nei le sui usufono fai mai e talanoa i lona tama ma lona tina, e sau loa lauga. E leai o au, ou te talanoa i lou itumalo, e sau e momoli le finagalo lea o lo outou itumalo i le Maota o Samoa, e faapena. E pei o lea e manaia e au ai foi i auala o lo o faaoga nei, ua tau aafia i timuga. Leaga o tatou, a oo loa i le tau lenei ua tatou vaai loa auala ua le lelei. Ou te le iloa po o se faafitauli tau inisinia, ae toe silasila ai foi lau afioga i le Minisita. O lea foi o le a toe fai le auala lea i le alu agai i le malaevaalele. E lei leva nei lava ona o mai ai le kamupani mai Niusila na paaga ma le Swell, na fai atoa ai le auala lea e tau i le malaevaalele, ae e lei faia le auala lea e tau i sasae. E lei i ai lava se taimi ua faapea mai le Malo o le a fai le auala lea. Ae a outou o i le auala lea i le matou itumalo, ua matuai afaina lava le tulaga o lo o i ai i le taimi lenei. Na ona o matou faapena atu. E leaga a totogi le laisene o taavale, e tutusa lava laisene o le taavale e alu i o, ma le laisene o le pasi lea e alu i Falefa. A na faapea e fua i le leaga o auala, sa tatau ona fai suiga, a mea o lou itu lea e te alu ai, o le a pau lau laisene leaga e leaga e le auala. O le mea lea e tuuina atu sei silasila i ai le LTA i ia tulaga. E leai se tulaga o lea e tau saunao isi sui usufono, e faasea i le Ofisa o Aoga. Ona o tulaga i iuga o suega. Ou te le malamalama i lo tatou atunuu, o le tele o sao o le Malo. E aoga fua le fanau, ave atu tupe e totogi ai faiaoga. O le tele ia o mea ia e faalelei i le tulaga o le siitia o le auunaga a faiaoga. E le o mapu le Ofisa o aoga i le faiga o mea uma. Ae sei silasila ifo matua, e i ai lo outou sao i le atinaeina o fanau. Ne i tei ua outou lafo mai i faiaoga, leaga e tele ia o distractions ia ua i ai nei. Ua te i lava ua ola le moli i le po atoa, ae le iloa o le internet le mea la e fai, o facebook, ona maumau atoa ai lea, ona tuuai lea i le tuuaiga faigofie, e leaga faiaoga. Ae le iloa e tele foi le sao, o tatou matua e tau vaavaai tulaga ia, siaki lau fanau po o sao mea la e ao. O le molimau a le isi tamaloa, fitusefulu pasene o tagata i luga o le internet, o le mea leaga la e matamata ai. O le faaogaina lena o lea ua i ai nei. Ou te le o fai atu o le leaga le mea, ao mea na o lea ua sui ai mafaufau o tamaiti ma faaletonu ai aoga. Ao lea o le a tuuai mai o le Minisita o le faiaoga o le ulu aoga.....e le...o la tatou avega e tauamo faatasi. Lau afioga ao le tele ia o mea ia e agai atu i ai le Malo e faamanuiaina ai. E pei foi ona saunao, o tatou na aoga, a tuua le aoga i nai tuuaga tai lua vaiaso, ona ave lea o ta ita ta te alu e vele le maumaga o le isi aiga e maua ai so ta pili. Na o tatou ui uma lava i mea faigata na. Ae a le mea lea ua i ai, o lea ua o tatou iloa e leaga le mea. E leaga

le mea o le ola le tagolima, ona finau laia. Ao le mea lea ua i ai nei fanau, ua aooga fua, nofo fua, ai fua. Ao le a le tulaga o aliae mai, e leai se mea o tino mai.

Ona i ai lea o le talitonuga, o au lea o le isi tagata e aafia lou itumalo i le Tulafono lea o le Palota. O lea la ua ou alofa atu, o lea ua aumai finagalo e pei ona i ai i le taeao ua sola. O Saleaula, Tafua, ae sa ou manatu foi e aumai se mea faapea a lou itumalo. Ae ui i lea, o i e iloa ai, sei e toe silasila ifo lava i le komiti. Leaga e faaoloataua e le komiti sui ia, e aumai mea ia, ae le faia le galuega. O lea ua aumai le lipoti, e tele taimi na o matou o ai i uta e leai se mea o sau ai. Ae mananao e o matou e toe aumai e faalepeti le filemu lea. E le faapea le ala o le faiga o tatou. Sei toe siaki ifo lau afioga, o nei komiti uma e i lalo uma lava o le faamalumaluga a lau Afioga i le Fofoga Fetalai. Ao lea o le a taamimilo mai ma fai mai, fai mai ni a outou tusi tou te ui mai i le Tulafono Tumau. Ao le Tulafono Tumau e leai sona malosiaga faaetulafono. E na o mea e liolio ai le Fonotaga lenei ma tatou talanoa ai iinei. Silasila la i le taitai seseina o le atunuu lea ua i ai. Ae afua mai i le komiti le le sao o le aumaiga o le mataupu. O mea ia e ono mama ai lo tatou sa ma o tatou faaletonu ai. Ae ui i lea, o le manatu lava ia o Lufilufi, ia nofo lelei Samoa. Ia utagia le mea ua aumai e le Malo, pe tatou te gogoto ai lava, tatou te o faatasi ai lava i lalo. Ae tatou talia lea mea i lenei vaitau.

O au lea na ou foi mai nei lau afioga ua ou vaivai, o lea sa ou alu e momoli le faaaloalo aua le tuumalo o le afioga ia Pa'u. O lea la ua uma ona momoli sao lava i ai i le aiga ou moomooga alofa, ma ia talosia le faigamalga. Ia tafi mala foi i totonu o le Maota lenei aua le tuua foi o le malo e le afioga i le sui usufono. Ia faamaise foi le Atua i le paia o le aiga. Si ou itumalo, o lea lava e manuia mea uma, e leai se mea o faaletonu E pau lava lea, toaga e tatalo aua se manuia o le Afioga i le Palemia ma Minsita ia fai atinae a lo tatou itumalo. O la matou tala lea ma le faaaloalo. Manuia lau Afioga i le Fofoga Fetalai, manuia foi le Palemia ma le Kapeneta, manuia le la tala na atoa, ae o matou ola i le alofa o le Atua. Soifua ma ia manuia.

FOFOGA FETALAI: Malo faafetai saunoa i lau afioga i le sui mamalu. E le tau laeia i se upu le toga lelei, e le tau paopaina foi i se faamatalaga, ia le maa e fai ai le ai o le taulafoga. Malo saunoa faafetai

O lea ua o tatou taunuu i la tatou malologa masani, ona i ai lea o le manatu. A tatou taliu mai i la tatou malologa masani, ona tuuina atu loa lea o le avanoa i le Taitaifono o le Komiti o Tupe, o le sui mamalu mai le itumalo o Alataua i Sisifo.

Na faataatia ese Taulumaga a le Fono Aoaofa Fautulafono mo lana malologa masani i le itula e 8: 47 i le po ma toe faaauau i le itula e 9:38 i le po.

Na toe faaauau felafolafaiga i luga o le faitauga faalua o le Tulafono Tau Faaofi o le Faatatauina o Tupe Faaopopo (Nu.1) 2018/2019.

FOFOGA FETALAI: Ou te faasilasila atu, ua toe amatalia nei Taulumaga ma Galuega a le Fono Aoaofa Fautulafono. E momoli atu le faamalo ma le agaga faafetai, malo le onosai. Malo foi le tauatai i le faatinoga o le tatou galuega. Ou te faamalulu atu i nisi o sui usufono o lo o faapena ona i ai lo latou agaga e fia saunoa, ia ona ua maea ona faatulaga galuega ma le poloaiga

a le Nofoa. O le amataga o le tatou foi mai i la tatou malologa, O le a saunoa ai le sui mamalu mo Alataua i Sisifo, o le Taitaifono foi lea o le Komiti o Tupe. Tapa lau afioga i le Taitaifono o le Komiti o Tupe.

Afioga ALIIMALEMANU ALOFA TUUAU (Taitaifono Komiti o Tupe: Manuia le tausaga fou, malo folau. Lau Afioga i le Fofoga Fetalai, o saunoaga a sui usufono mamalu agai i le Tala Faatatau Faaopoopo Muamua o le Tupe, e laiti lava nai mataupu e le o ni mataupu taua o lo o fesiligia ai le Lipoti a le Komiti o Tupe Maua ma Tupe Totogi, o le a faamuli i ai sina faamatalaga. Ae se i fai muamua sina tala i le vaaiga lautele i le soifuaga ua tatou i ai nei. E leai lava ni mea fou. Lau Afioga i le Fofoga Fetalai, o upu ia ou te faalogo soo ai i totonu o le Maota lenei. Atonu la e le fou i le tele o sui usufono o le Maota lenei, ae mo lou lava ia sui usufono tau atiae, e taua lava i le faalogo manatu ona faaoga lea na o mea lelei. O le matou tiute lea o le faufautua, e aoga mea ua tutupu e poupu ai lo tatou sa e fautele. E faataua tele le mataupu tautalagia soo i galuega mataitu a ituau faafetauagai e tolu o le Malo. E mataitu ai e le Pulega Faatonu le Palemene ma le Famasinoga, mataitu e le Faamasinoga Pulega Faatonu ma le Palemene, e mataitu foi e le Palemene le Faamasinoga ma Pulega Faatonu. O le faamanatu o le aiaiga e mataitu ai e le isi itutino le isi itutino po o le siaki ai foi e le isi itutino le isi itutino lau Afioga i le Fofoga Fetalai, ua le nofoai ai lava ae avatu pea se fautuaga ona o la tatou avega e tauave faatasi. E le mafai la ona aloese Alataua Sisifo i tiute mataitu a le Palemene lea o lo o matou faatino atu e ala i Komiti faa-Palemene i le siakiina o galuega a le Malo.

O le aoga o lenei sui usufono o avanoa e maua i le Tala Faatatau Faaopoopo o Tupe, o le toe tepa lea i tua i a tatou tala faatatau ma fua pe na a mai le faatinoga o galuega mo le tatou agai atu i sini autu o le tamaoaiga. I se vaaiga lautele, e ono sini autu o faiga faavae tau tupe a le Malo. Ma e matauina ai pea ma le agaga faafetai le faaauau pea e le Malo o le tauaveina o tapulaa ina ia ausia. O le itu taua muamua o ia faiga faavae mo le silafia e nisi o le Maota nei, o le tulaga lea ina ia i le va o le 35-38% o le tamaoaiga le aofai o tupe faaalu masani mo auunaga ina ia lava tupe faasaoina mo le atinae o vaega tumaoti faapea avanoa mo galuega. A tuu la i ai le tupe faaalu faaopoopo lea o le Tala Faatatau lea, ua \$708miliona ai le tupe faaalu, ae matau atu o lea ua \$2.2miliona o le tatou tamaoaiga, ma ua ausia le pasene faatapulaaina mo le tatou tamaoaiga. O lona lua o faiga faavae, ia faatumauina i lalo ifo o le 50% o le tamaoaiga le aofai o aitalafu ma nonogatupe a le Malo i le Tala o le Tupe 2016/2017, aua ou te talitonu o lea toetiiti taunuu mai le 2017/2018 lea e faamauina ai le \$1,094,000miliona, o le 50.4% o le tamaoaiga a tatou aitalafu. E ala ona ou toe taua le tulaga lea, ona o le tele o le matau atu, o le popole o le toatele o le mamalu o le atunuu i a tatou aitalafu lea e faalava ai atinae o le tatou Malo, o lea o lo o ausia lelei lava le 50% e tatau ona gata ai a tatou aitalafu.

O le faiga faavae lona tolu, ia i le va o le 40-50% o tupe faaalu tupe faaagaaga mo totogi o tagata faigaluega a le Malo, ina ia ogatasi ma le manulauti a le Malo ina ia siitia le faatinoga o auunaga. E ui lava ina ua aumai siitaga o totogi i le Tala Faatatau Faaopoopo Muamua o le Tupe, ae o lou fiafiaga, pe a faaopoopo le \$8.9miliona lea e aumai i i le siitaga o totogi, ua atoa ai loa le \$242miliona o tupe ua faaaluina mo totogi o le aufaigaluega. A faapasene la i i a tatou tupe faaalu o lenei tausaga, o lea la faatoa ausia tonu lava le va o le 40-50%, o lea ua 42%. Atonu o le mea tonu lea ua tatau ai ma onomea le aumai o le siitaga i Tala Faaopoopo Faatatau Muamua ina ia

mafa'i ona ausia le isi tapulaa lea o faiga faavae. O lona uiga o la sa i lalo lava a tatou pasene o totogi sa le i ausia le isi a tatou faiga faavae.

O lona fa, ia faatumauina i lalo ifo o le 3.5% o le tamaoiga le faasiliga o tupe faaalu nai lo tupe maua. O lo o faamauina le .1% o le faasiliga o tupe i le 2017/2018 e ui e le i oo mai i le Palemene, a o le tausaga i ona tua atu sa faamauina ai le maualuga i le 3.5% o le faasiliga o tupe faaalu nai lo tupe maua.

O lona lima o faiga faavae, o le faaleleia o galuega faatino a Faalapotopotoga a le Malo ina ia faamama avega i le Tala o le Tupe, ia lea o lo o i le tatou Tala Faaopopo le \$4.1miliona lea e fesoasoani mai ai Faalapotopotoga e ala i le faasiliga o tupe mama po o dividends lea ua mafai ai ona faatupeina le Tala Faaopopo Muamua. Ua ausia uma la matatia ia e lima o faiga faavae a le Malo aua le sini autu mo le tatou tamaoiga, se i vagana ai la le vaega lona ono o faiga faavae.

O le uunaia le faaleleia o tupe maua a le Malo. E ui o lo o solosolo lelei pea le aoina o tupe maua a le Malo 2016/2017 ia ma ausia tapulaa faatulagaina ma ova atu, ae i ai lava le atugaluga faa-Suetusi a lou nei sui usufono. O lo o i le lipoti o faamatalaga o tupe 2016/2017 le vaegatupe e \$92.7miliona o aitalafu tuua e le o tuuina i totonu o faamatalaga o tupe pei ona tauave mai i le Lipoti a le Suetusi. O le luitau muamua lava lena lea na matou tuuina i le Afioga i le Ofisa Sili o le Matagaluega o Tupe. E talitonu i le tomai ma le silafia o le a mafai ona foia i lo tatou taimi lenei faafitauli. E le o se faafitauli i le 3 pe 5 tausaga talu ai, o le faafitauli ua leva ona tauave mai. E tele tausaga ae sa le i faia i ai se tatou tonu. Ou te talitonu la a tatou toe tuu atu i le isi Paeaiaga e omai latou e fai, e lagona a lea o lou faanoanoa, aua foi e le mafai e le Suetusi Sili ona tauave ana lipoti ia, e tauave mai pea i le isi tausaga ma le isi tausaga se i vagana ua fai i ai se faatinoga ma se faaiuga e fofu ai le faafitauli. O le fautuaga, ina ia i ai nisi faapitoa pau lava lea o le galulue i le lisi lea ma se tasi o le Ofisa o Tupe e lisi mai po o a aitalafu ua ova i le 20 tausaga, po o kamupani po o tagata taitoatasi ina ia tusiesea pe write off le uia o auala masani i tulaga faapea, aua e talitonu e le iloa po ua leva ona tapunia nisi o kamupani o i ai i le lisi. O le naunautaiga lava ia o le Alataua Sisifo, ia fai se fofu i le tatou taimi.

Lau Afioga i le Minisita mo Galuega, faafetai tele lava, e matau atu o la e ua amata le galuega o le matou auala taavale i Neiafu, ae i ai ma le fautuaga. E matauina pe a ou alu nei i Savaii i lau matau i konekarate tetele foi nei e faia galuega ia o le moaina o le vao ma le faamama o autafa o le auala. E faataua i lou mafaufau le faasoaso atu i le lautele o le atunuu o le tamaoiga. Why distribution of wealth. Ona i ai lea o se lagona, ae a pe a faamatuu atu i tua i nuu galuega nei, latou te faatinoina le moaina ma faamama autafa o alatetele. A faapea e i ai le nuu e le faia le latou galuega, atonu o i ina o le a faaoga ai loa se konekarate aua e uma ane pe na o se tolu lava i le fa ni nuu o le a faaoga i ai se konekarate moa auala.

FOFOGA FETALAI: Tulai mai le Minisita mo Galuega.

Susuga Hon Papaliitele Niko Lee Hang: Lau Afioga i le Fofoga Fetalai, ou te le fia faauilavea i le saunoaga matagofie a le Afioga i le Taitaifono o le Komiti o Tupe Maua ma Tupe Totogi, ae ua ou tulai atu ma le faaloalo i le tulaga lea e saunoa i ai le Afioga a le Taitaifono, o lea ua ave o lea foi ua tapena le LTA ona e lua tausaga o konekarate ia e faatino i le taimi nei. O lea foi ua fai le fautuaga pei ona e saunoa i ai, ave pea la le avanoa e fai se survey

i nuu ma afioaga, pe mafai ona faatino e latou galuega ia, aemaise lava la lumafale o aiga i totonu o nuu ma afioaga. A o le vaega lea na o vaomatua, e tatau lava ona fai e konekarate. A o le vaega lea e agai mai i ai lau saunoaga, o la e ua tapena i ai, faafetai.

Afioga ALIIMALEMANU ALOFA TUUAU: Faafetai tele i le Afioga i le Minisita i le tulaga ua oo i ai fuafuaga mo se mea o lo o nanau i ai le mafaufau i le faasoasoa atu i le lautele o le atunuu o tamaoaiga. Ona oo atu lea o se faamatalaga i mea nei o auala galue, e i ai se fautuaga, a oo ina sua auala o nuu, aua ou te iloa leiloa pe toetiiti oo atu ma le isi faasologa lena i le matou itumalo, ona ave lea i ai o le maliega, e tatau ona tausii lelei e ia nuu auala galue, aua e matau atu, e uma ona sua ma faatino galuega lelei i auala, ae toe faatalitali mai foi nuu, e toe o atu foi le Malo e toe maintain ma toe faaleleia. E tatau ona ave le ownership, ave i ai i nuu ma afioaga e ona auala nei, tuuaia le aualatele o le Malo, a o le auala galue, ina ia fai ma latou galuega le faamama o auala galue nei, nai lo le uma o le tolu i le fa tausaga ae toe tagi mai foi i le Malo e toe sua auala nei agai i uta. Ia i ai se contribution, ia i ai se latou fesoasoani i meatotino nei, aua o afioaga lava nei e faaogaina nei auala i le tele o taimi. O i foi tatou te iloa ai pe a toe talosaga mai i le isi sefulu tausaga i le faaleleia o auala pe sa fai i ai se latou galuega pe sa tuu lava e faavaoa se i toe alu atu le masini e sua ona toe fai lea ia lelei.

E faapena foi la se lagona lea sa tau avatu nei i le moavao i konekarate fai auala. O lo i ai aiaiga o faiga faavae o auaunaga o le procurement of services, ia e talitonu o lena e faataua le quality o galuega ia faapea le tau. E talitonu foi e tele taiala mo le faaogaina o auaunaga i galuega tetele, e aumai e tatou paaga mai fafo, ma e tatau ona tatou usitaia. E faapena foi isi atunuu laiti uma.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai...

FOFOGA FETALAI: Tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: E faamalo i le sui usufono i le lagalaga mea lelei, aemaise lava le tulaga lea i le fautuaina o nuu ia teuteu ia latou auala galue ia ua uma ona fausia e lo tatou Malo ina ia umi ona lelei. Ia o lea foi ua aumai se manatu lelei e le fou ae sa aumai foi isi fautuaga pe mafai ona tuu atu i nuu e teuteu e latou. Ae o le ki atoa o mea ia, o le pulenuu. O latou ia o lea e lafo atu i ai ia le faatuatuaga o le tatou Malo.

E pei foi ona silafia o lea sa fai le fonotaga a pulenuu ma le Kapeneta na ou ave i ai ni nai fautuaga faatama i le faatinoga o le latou galuega. O le faafitauli lea e faafeagai pea ma le Malo, o le o mai o toeiina foi lea ua toetiiti lava le toe aoga. Ia ma o le manaia ia o le ata na pue, o le matou ata na pue, ae ou tilotilo atu, se o toeiina uma ua litaea ua tatau ona litaea. Ae o latou uma lava nei o lea e faatuatua i ai le Malo i mea nei.

E i ai le tausaga na totogi ai e le Malo, e le gata ona fai auala galue toe totogi e le Malo ia tupe e ave ao ou Minisita o Tupe i le taimi lena e ave e fesoasoani ai i nuu e teu o latou auala galue. O le mea foi lea o le o taulelea e teu ia auala galue ae totogi. Ua le gata ina o atu le Malo e fau ia le auala galue, ae toe avatu ma le tupe e totogi ai taulelea e o e fau le auala galue e teuteu le auala galue. Ia o le mea la ua tupu, ua alu alu lava, alu atu asiasiga, maua ai

faamatalaga a le tele le tupe e aumai, toeafe matou toe o e teu le auala galue. E pei e foliga mai foi lea ua toe o atu le Malo e fau le auala galue toe o atu foi toe avatu tupe e uunaia ai nuu e o e faatonu taulelea e o e teu latou auala galue, tipi ai loa i ina, le toe avea se tupe. O lea ou te manatunatu i le mea lea o le tuu atu foi i nuu e o ane latou e teu auala, e leai lava se eseesega ma le mea lea na avatu ai tupe e teu ai auala galue, o lona uiga, o isi foi tupe e lafo i le sami. Na ona lafo atu lava ae vaai atu o la e leaga lava auala. O le mea lea, taatia mai pea, o le tele o manatu ia e aumai ua foi mai ai le Malo, ae le mafai ona lelei mea ia pe a le sui atoa le filifiliga o latou e omai e avea ma Sui o le Malo i le alu lava i le feagaiga tuai, se tuu i ai le Sao o le nuu, si toeaina e alu e nofonofu ai ma le faletua foi o le faatumutumuga o le nuu e alu e nofonofu ai i o. E fiu lava la e fai atu mea ia, ae a le suia le tulaga e tofi ai tatou Sui o le Malo, o le tulaga lena na o tupe lava e togi i le sami. O le mea lena e tupu, ma e fesoasoani foi ia i tatou, tatou o foi tatou e faafono tatou nuu ma o tatou itumalo ma avatu i ai le talaiga o le talalelei. A fia faaleleia mea ia, ua tatau foi ona sui le fililiga o tatou pulenuu po o Sui o le Malo, e le gata i tama ae faapea foi tina. O lea sa ou faamanino pe ua silia nei i le 10 tausaga talu ona lua fonu. Ua le gata o le fonu a pulenuu pei ona masani ai mai aso o le nofo kolone, a o lea foi ua fai ai ma le fonu a pulenuu fafine, po o Sui o le Malo. O i ai lava galuega e faapitoa i tina latou, e aofia ai le faamama o nuu, faamama o aai, faamama o fale, aemaise le tausiga o le fanau e o i aoga i le tulaga tau le soifua maloloina, ia ma tulaga masani o le fai o le siapo ma lalaga le ietoga. O le mea lena na ala ai ona fai le isi fonu lea, ae i ai foi ma tulaga faaletonu la e aliali mai ai i le mulimuli lava i le fausaga tuai lea e o ai lava tatou, ua tatau ona sui le mea tatou te o ai, ma o le tulaga foi lea sa ala ai ona feiloai le Kapeneta ma pulenuu po o Sui o le Malo, tamaitai ma alii ina ia aua ne i tuua le tuualalo, le fautuaga i o tatou nuu ina ia faaoga tatau seleni a lo tatou Malo o lea e fai ai tatou alauni. Lau Afioga i le Fofoga Fetalai, o le tulaga lena, ae tatau foi ia i tatou o faipule ona fai ma tatou o tatou te fonu i tatou nuu ma taologologo i ai nisi o mea ia tatou te talanoa i ai, nai lo le mea lea o nisi faatoa alu atu lata i le palota, o la foi e popoto latou e matau mai lou faatoa alu atu, ina o le a lalata ina fai nisi a tatou suega.

Lau Afioga i le Fofoga Fetalai, o le fesoasoani atu lena e faamalo i le sui usufono o lo o saunoa nei.

FOFOGA FETALAI: Malo. Tulai mai le sui usufono o lo o saunoa.

Afioga ALIIMALEMANU ALOFA TUUAU: Ia, faafetai mo le faamalamalamaina atili o lea mataupu. Atonu o lea sa le talafeagai i lena vaitau, ae sao le saunoaga, ua tatau ona sui i lenei vaitau ma tatou talia suiga o lo o taumafai atu i ai.

O le mataupu lea sa ou fia talanoa atili e auga atoa i ai se talanoa i lenei afiafi, o tulaga ia i aiaiga ia e aumai a tatou paaga mai fafo, lea e faatino ai le faatauina po o le procure ina o auaunaga. Ua masani foi tatou i tulaga e tele ia o aiaiga e aumai a tatou paaga aua leaga o latou e i ai tupe. Sa ou faigaluega foi i ia ituaiga ofisa, ma o mea lava ia e mulimulitaia i se faiga o se galuega. Ae peitai ua oo mai i totonu o le Malo, ma ou matau ma ou vaavaai ae le na o le tatou atunuu foi ma atunuu laititi faapea foi le lalolagi atoa, ua avea nisi o aiaiga nei, e i ai lava auaunaga e talafeagai i ai donor restrictions nei, ae ua i ai foi isi tulaga ua le mafai ai ona faasafua atu ma faasoaso atu i le lautele o le atunuu le tamaoiga, ona e le ausia e latou tulaga e tatau ona latou ausia ina ia mafai ai ona latou tauva pe mafai ai foi ona latou maua galuega. E le o ia te au

se tali atoatoa i le taimi lenei, ae i sou vaivaiga, pe le tatau ona tatou toe iloilo i faiga faavae mo sini autu o le tatou tamaoaiga pe a oo ina toe iloilo ina ia mafai ai ona faalatele le faasoaina o le tamaoaiga ina ia maua ai avanoa mo i latou e mamao i tua ma le taulaga faapea foi nisi e le o oo atu i ai le faaso, ae aua foi ne i tatou o ese mamao ma taiala. o le naunautaiga lena o le wide distribution of wealth. Ona faauma ai lea o se tala i lea tulaga.

Lau Afioga i le Minisita mo Pisinisi, Alamanuia ma Leipa, faafetai lava malo mo le filifiliga toa, ou te talitonu o le isi lea faaiuga matua sao lelei lea a tatou le faia o le tatou vaalele. E pei ona folasia e nisi o sui usufono le manaia o le lua pe tolu ni a tatou tatou vaalele e faapaleni ai e le isi vaalele pe a i ai se faaletonu i le isi route po o le isi foi vaalele. O le tele o le lele mai o vaalele i totonu o le atunuu o le atili faatupulaia foi lea o le tamaoaiga, aua o lea ua faamauina i faamaumauga a tagata maimoa mai fafo, o le tulaga lea sa uunaia ai le tamaoaiga o le tatou atunuu.

I se faatalatalanoaga a le Ofisa lea o Tagata Maimoa Mai Fafo, o le latou tala mai e 56% le occupancy rate po o e o lo o nonofo i faletalimalo. Lea foi o lo o maua i lipoti a le Ofisa o Fuainumera Faamauina, malo lava. Manaia tele le suiga lea ua sau ai a tatou lipoti ia mai le Ofisa o Fuainumera Faamauina. E manaia aua foi o la ua iloa ai i ina po o a fua o faatoaga la sa tele i le maketi, o le latou saofaga i le tamaoaiga ae faapea foi le aofai o e nonofo i faletalimalo. Faafetai mo le auunaga. Ona toe foi mai lea o le tala lea i pasene ia o e faaoga faletalimalo, e talitonu i faatalatalanoaga, o le occupancy rate lea po o le faaogaina, e matele lava i faletalimalo tetele, o lea tatou te matauina foi lava, o le Taumeasina, le Aggies po o le Tanoa. A o nai faletalimalo laiti po o le faaleogalua e tau le ausia le 40% o le occupancy rate. O le faafitauli ina ua fesiligia le Ofisa o Tagata Maimoa Mai Fafo, ona o le taugata po o le le ausia foi o standards, matatia e tatau ona i ai faletalimalo. O isi pisinisi faatoa faailoa lava i le Ofisa o Tagata Maimoa Mai Fafo a ua uma ona fausia. Ou te talitonu o lea e aoga fautuaga lea a le Ofisa i mea ia ua tutupu mo faletalimalo o fofou e fia fausia. A o se manatu e fia avatu, o nai isi la faletalimalo ia sa ala ona o e fai ia auunaga e faatino nei pisinisi taugata ona o le taumafai ina ia fesoasoani i le tamaoaiga o le atunuu. Peitai, ua le ausia e latou ia tulaga. Ou te talitonu o le naunautaiga o nai foi nei tagata ia i ai so latou sao i le tamaoaiga o le tatou atunuu ae o lo o faaletonu lava le aofai o e mafai ona faaogaina faletalimalo. Ona i ai lea o se manatu, pe a pe a toe silasila i ni auala e fesoasoani ai ina ia faaauu pea ma faateleina le sao i le tamaoaiga o ia pisinisi faaleogalua po o pisinisi laiti.

Faafetai mo avanoa faigaluega faavaitaimi lau Afioga i le Minisita. E lagona lava le faafetai i avanoa aemaise mo matou e mamao mai Savaii. Atonu e malie ia te outou, ae mo si o matou nuu i Savaii, na ona foi mai lava o le toasefulutasi lea na o i le tausaga na tea nei ono loa taavale fou i le matou nuu i le vaiaso lava lena, lima fale na toe faaleleia e i ai ma fale fou. O le fiafiaga sili, o le vaai atu lea i le i ai o le suiga i le siitia o le tulaga ua i ai nai aiga ia limavaivai a nai tagata i tua. Faafetai mo ia polokalame matagofie.

Ona oo mai lea o se tala i le Minisita o Tagata Faigaluega a le Malo. E matau atu le tele o Ofisa Sili o Pulega faapea foi Pule Sili Lagolago i le polokalame lea mo le fesuiaiga mai lea taimi i lea taimi mo Ofisa Sili o Pulega po o Pule Sili Lagolago. E masani lava ona faapea le Ekalesia Metotisi pe a fesui ai latou faifeau, ia e fesui ai laau o le faatoaga. E lelei la le faifeau aua e sau mai le isi nuu alu i le isi nuu a o la e faaoga pea le tomai. A o le manatu lea e tau avatu, pe le tagatagai tatou po o le a se auala tatou te faaogaina ai pea le tomai ma le silafia ma le agavaa o tulaga o Faauluuluga o Matagaluga ia ua uma

konekarate ae tele investments a le Malo na alu ai. E lelei suiga e fesuisui, ae pei o le manatu lea e tau avatu, o le tele o le tomai ma le agavaa lea ua o atu nei saofafai mai tua, e lelei lava pe a o atu loa faipisinisi, ae pe leai se fuafuaga ina ia faaoga ai lea tomai, pe faakonesale, po o le a lava se faiga a ia tapue mai le tomai lea ma le agavaa ua le toe faaogaina ona o tulaga lava i suiga o tatou konekarate, o le mea e talafeagai. Ia, toe tasi lau Afioga i le Fofoga Fetalai, ona ou oo mai lea i le Falemai, i le aoga o le polokalame lea o le PEN, faafetai. O lea sa faatino e le kamupani lea o le Digicel nisi o ia tulaga. O le matau atu pei ona laga i se fesili a se tasi sui usufono ia tupe ia i le Ofisa o le Falemai, o lea e i ai le \$2miliona mo le aveina o gasegase i fafo. O lea foi sa taua e nisi o sui usufono le prevention programme, le faataua, aua e talitonu lava e siisii lava i luga e oo atu i le \$10miliona a tatou tupe faaalu, aua o lea ua oo atu i le \$8miliona mo le auina o gasegase i fafo. Ona i ai lea o se vaivaiga i polokalame ia pe a pe a outsource, avatu i tua, aua o lea e matau atu pau lava le galuega lea e o atu fai o le fua o le toto, fua le suka, fai i ai lapataiga foi ia, pe refer i le fomai pe afai ua tuga se tulaga o i ai, o mea e mafai ona aoa ma faaoga i ai komiti po o ni groups foi e faatinoina le prevention programme, aua e matau atu e toagaogao le aufaigaluega i alii ma tamaitai fomai, e le o mafai foi la ona lautele atu i tua le prevention programme, se i vagana ai le National Kidney Foundation lea latou te taumafai pea e fai lea auaunaga ina ia faalauiloa pea a tatou faamai le pipisi lea o lo o toatele ai le atunuu o lo o aafia ai.

Ia, ona faauma atu ai lea o se faamatalaga, lau Afioga i le Fofoga Fetalai, o le miti lava ia a le Alataua Sisifo mo le isi 20 tausaga pe a oo ina gasolo mai isi augatupulaga, o le tuufaatasia atoa ai lea o a tatou alagaoa, mobilize a tatou resources ae faasoaso atu i se tulaga e faaso lautele i le mamalu lautele o le atunuu e ala i auaunaga ae tataua ona siitia le tomai, e tataua ona i ai galuega e tataua ona fai, ina ia mafai ai ona faatino lea tulaga i le isi 20 tausaga o i luma.

Ia ona faauma lea o lau tala i le matou manao toe faamanatu, lau Afioga i le Minisita o Aoga ma lau Afioga i le Palemia, e toe faamanatu atu le faleaoga o le itumalo o Alataua Sisifo, e talitonu o lena e ave le faamuamua i a tatou taaloga o le Pasefika, ae le uma pea le taologologo ona o mea e tataua lava ona faatino.

Lau Afioga i le Fofoga Fetalai, ua taoto atu se manatu o lena itumalo. Ona i ai lea o le taofi, o le a foi le leo o le Alataua Sisifo. O le a se upu ua le taugamalie i le faafofogaaga, ia tofamalie ma uta malie, ae se i tali atu lava i nai fesili laiti ia sa i ai.

O le fesili i le vaegatupe faapopopo i le falemai i le \$5.7miliona po o se vaega lea mo le toe tuufaatasia o le auaunaga, o le tali e leai. E \$3.7miliona mo le siitia o totogi o le aufaigaluega lea e 1,022 le aufaigaluega a le falemai, ae o le \$2miliona pei ona ou taua mo togafitiga o gasegase e auina atu i fafo, lea ua atoa ai le \$8miliona o tupe faamatu atu mo le auaunaga.

O le isi manatu o le tulaga lea i le Lipoti lea e taua ai le Labour Act 1972. O le mea foi lea e tupu pe a saosaoa tele le tekonoosi, atonu ua misi i le failautusi ona tuu i ai ma le Tulafono Toe Teuteu o le 2013, aua o lena e i ai le amendment o le Labour Act, lea foi sa laga mai e se isi po o le a le tulaga o brackets la e i ai le \$165,000 ia o le faaitiitia o tupe alu i le polokalame a le Matagaluega o Tupe. O le typical error pei ona taua, ai ua vavevave tele le topeina o le taina o le lipoti ae sa le tataua ona i ai lena faaiuga i tafatafa o le \$165,000.

Ia, alofagia e le Atua lau Afioga i le Fofoga Fetalai, ia maua lou malosi, maua lau tofa aua le faatautaiga o le Maota o Samoa. Ia agalelei le Atua i lau

Afioga i le Palemia, le Sui Palemia, Afioga i Minisita faapea Minisita Lagolago, maua foi se malosi o lenei Itu o le Maota, faapea sui o Matagaluega ma Faalapotopotoga o lo o tatou mafuta i lenei afiafi. Ia folau i lagima le sa o Samoa.

Lou itumalo o Alataua Sisifo, ia faamanuia tele le Atua i le tatou itumalo. Faafetai i le Sui Failautusi ma le Ofisa o lo o tautuaina le Palemene. Soifua.

FOFOGA FETALAI: Malo faafetai saunoa i lau Afioga i le Taitaifono o le Komiti o Tupe.

Ma o le avanoa foi lenei ou te tapa ai lau Afioga i le Palemia ona o lea ua oo mai i le saunoaga a le Malo e talifuaitau i nisi o mea sa laga e sui usufono mamalu. Ma lou faaaloalo.

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: Faamalo i lau Afioga faapea foi le paia maua i le Maota nei. Ua faafogafoga le mamalu o le atunuu faapea foi le Kapeneta i a outou saunoaga i fautuaga ua faamauina. O lea foi ou te matau e i ai vaega o nisi o mataupu sa laga ua maea foi ona talifuaitau le Kapeneta e faamanino a o faagasolo saunoaga a le tatou Maota nei. Ia ma o lea la ua agai mai i le Kapeneta nei e talifuaitau i nisi o mataupu sa laga, ma e i ai le taofi o le a faagasolo loa le tali faasolosolo a le Kapeneta, ma i le tulaga masani o le a amata mai i le Minisita mo Fesootaiga ma Faamatalaga Tekonolosi ona saunoa i nisi o vaega. O lea foi ou te matau e le o se Tala Autu o le Tupe e tele, o si tamai tala faaopopo lava laitiiti o le Tala o le Tupe. Ia e le tele foi ni mea matou te tali atu ai aua e le tele foi ni mea na laga mai. O mafauauga lelei ma fautuaga na tuuina mai, o lea ua faamaumau uma i lalo, ae o le a agai i ai le Kapeneta e silasila totoa i ai. O le ala foi lena o lea sa valaauina ai Ofisa Sili o Pulega e auai ma faafogafoga mai i le faaaliga o outou finagalo tuusao mai ina ia faigofie ona latou tapenaina le fautuaga mo le faatinoina o nisi o outou finagalo ua opea i lumamea. Lau Afioga i le Fofoga Fetalai, o le itu taua lena o le valaauina o i latou nei. O nisi o i latou e i ai malaga semeamanu e malaga ai i lenei vaiaso, a ua taofia e le Kapeneta e aua ne i malaga a o lea e Fono le Palemene. E leai nisi o toe aisili, o outou lava o tootoo o le atunuu, o outou itumalo lea ua fofoga le atunuu i outou finagalo faaaliga ma faapena foi ona talifuaitau le Kapeneta ma faasolo atu ai lava ina tatou agai i le auiliiliina o mataupu taitasi o le tatou Tala Faatatau Faaopopo o le Tupe. Ia ma o le tulaga lena o lea o le a amata ai loa le matou galuega, o le a saunoa le Afioga ia Afamasaga. Ia o nisi mea o totoe pe a o i ai ni mea o totoe ona ou talituaa atu lea e tali atu, ae a oo mai foi ia te au ua leai se mea, ia tatou o sao loa i le auiliiliina o le tatou Tala o le Tupe. Ia manuia tele le tatou po.

FOFOGA FETALAI: Malo faafetai ua faafogafoga le Maota ma o le a faapena ona fai. Tulai mai lau Afioga i le Minisita mo Fesootaiga ma Faamatalaga Tekonolosi.

Afioga Hon AFAMASAGA LEPUIAI RICO TUPAI (Minisita mo Fesootaiga ma Faamatalaga Tekonolosi): Faafetai atu i lau Afioga i le Fofoga Fetalai mo le avanoa, faamalo foi le tauatai i lenei itula o le afiafi i le mamalu o le Fonousu a Samoa, e le gata i sui usufono mamalu o le Palemene ae faapea foi Afioga i Ofisa Sili o Pulega eseese ma ofisa ua mafai ona tatou mafuta i lenei afiafi.

E manatu o lea ua maea ona lafo le tupemua o le taulafoga i lenei afiafi i le tali atu a le Malo i finagalo sa faaalua i mataupu foi sa lagalaga i finagalo o sui usufono e ala i le saunoaga matagofie a le Afioga i le Palemia e tomua ai le matou tali atu a le Malo. E tatou te muaau ma tumua ae muliaumasealii i le alofa ma le agalelei o le Atua o lea ua magoto foi le igafo i lenei vaega o le galuega e lagolago ai le Tala Faatatau Faaopoopo Muamua o le Tupe 2018/2019. Ia, ona faapea lea o se matou faamatalaga, e le tele tele ni mataupu na lagalaga i la matou matafaioi. Na o le lua ni nai finagalo sa faaalua i le tulaga o auunaga tau telefoni. O lo o ou faitau nei ma ou tilotilo i se lipoti sa faapena ona tapenaina e le Ofisa o le Pule Faatonu i le masina o Tesema. Mai le masina o Iuni 2018 i le masina o Tesema 2018, e 101 pou fou na faatutu o le auunaga tau telefoni i totonu o Upolu ma isi motu e oo atu i Salafai mo le faaleleia o le auunaga. E manatu masalo ai o le tulaga lea ua le tele ai ni finagalo lagalaga ona o lea ua tele ina faasopolia lo tatou atunuu i le auunaga tau telefoni. Ua outou faafofoga foi i nisi o saunoaga i le tulaga o le vave o le initaneti ua i ai nei, ia, o le tulaga lena pei lava ona outou silasila foi i le Saunoaga o le Tala o le Tupe, o lo o faapena ona faafetaia ai le tulaga o le auunaga faatekonolosi ma fesootaiga, ona o se tasi lea o vaega tele o lo tatou tamaoiga ua faapena ona maua ai i lenei taimi.

O le ono masina muamua talu ona ki le tatou uaea lea o le Tui Samoa ma faaaogaina, e oo atu i le 5% o le tatou tamaoiga ua faapena ona maua ai mai auunaga nei. O se tasi lena o itu aupito sili ona lelei o lo o faapena ona atagia i tulaga tau fesootaiga, aemaise ai le taumafai pea o le Malo ina ia faataunuu auunaga nei o uaea e fesootai mai lalo o le sami. E le na ma le laina ma o lo o outou faafofoga pea i polokalame ma saunoaga i le Afioga i le Palemia, o le Taitaifono foi lea o le tatou Komiti o auunaga faatekonolosi i totonu o le atunuu i ana polokalame i luga o le 2AP ma le TV i vaiaso taitasi. O lo o faaalu atu ai pea le tele o auunaga i le tele o le tekonolosi o lo o taumafai e le o na ma le laina lo outou faafofoga pea i polokalame ma saunoaga a le Afioga i le Palemia. O le taitaifono foi lea o la tatou komiti o auunaga faatekonolosi i totonu o le atunuu, i ana polokalame i luga o le 2AP ma le Televisi i vaiaso taitasi. O lo o faaalu atu ai pea auunaga a le Tekonolosi o lo o taumafai. O lea foi e faatali la tatou uaea lea ua amata ana galuega e taunuu mai i le faaiuga o le tausaga nei 2019. O le tatou uaea lea e sau mai Tahiti, ona atili ai lava lea ona faaleleia le faavavevave aemaise le faataugofieina o la tatou auunaga i le internet i totonu o le atunuu.

O le tele o le itu lelei o le internet faapena foi ona lagalaga finagalo i itu e faapena ona taumafai ai pea le Malo e puipuia o tatou alo ma fanau ma tatou uma. E oo lava i auunaga i totonu o pisinisi ma le Malo, Shada Security. Ona o le tele foi, e moni lava e tele itu lelei ma itu aoga, ae le mafai foi ona moemoenoa i latou amio leaga o lo o taumafai e faaleagaina lenei auunaga taua. O lo o agai pea i luma le taumafai a le Malo i ia itu uma.

Ao le fautuaga lava ma le tuualalo pea e pei ona faafofoga ai foi i nisi o sui mamalu o le Maota, e talosagaina lava totonu o aiga, o le amataga lava lea, ma le faavae foi lea o le puipuiga, ma le tapueina o le fanau ia faapena ona iloa faaaogaina le initaneti faaaogaina telefoni ma faaoga tatau. Matua e tusa lava pe tou te le iloa faaoga le initaneti, ia e talosagaina pea ma tuualalo le Malo e tauala atu i le Matagaluega ina ia faapena ona vaai ma faatapulaa le taimi o tamaiti, aemaise lava i le mea lea o le moe o le tamaititi ma le telefoni. E pei o itu ia o lo o faapena ona amata ai ona faaoga sese nei auunaga taua. Ao itu tau le aoga i aoaoga, o le aoga i itu tau le soifua maloloina, o faamaumauga o faamatalaga uma, aua le agai i luga o le atamai ma le poto,

ma saili ai foi pe faapefea ona faatino i ni tulaga lelei ma sili atu nisi o galuega o lo o i luga uma o le initaneti. O le fautuaga lava lea i lenei taimi ao taumafai atu le Malo i itu uma e puipui ai nei auaunaga.

Faamolemole matua o totonu lava o le aiga. Pulega a alii ma faipule, manaia nisi o nuu e faalogologo atu ua i ai ia tulaga ua faatulaga ai, ina ia puipuia ai le tele o i latou o lo o faaoga sese luga o le facebook, i le faaleagaina ai e le gata i totonu o nuu ao le Malo. E manatu o nai faataitaiga lelei ia e mafai ona silasila i ai le tele o afioaga, ina ia faapena ona taumafai pea e tausi le filemu o lo tatou atunuu. O lenei foi taimi ao taumafai atu le auaunaga a le 2AP, ua toe faalelei le pou tele o lo o i tai i Mulinuu i autafa ane o lo tatou Ofisa. E faamalulu atu o le tele o lo tatou atunuu o lo o faapena ona taumafai mai ma fesiligia le le oo atu o le auuanaga i nisi o itu i nisi o taimi aemaise lava i polokalame a le Afioga i le Palemia o lo o taulogologo ai i mea a le Malo.

Ona ua outou le faafofoga i ai, o lea ua toe faaleleia la tatou pou. O le pou lea o le auaunaga a lo tatou ofisa faasalalau o le 2AP, e le gata i Samoa nei, ae o lo o faapena foi ona faafofoga mai ai Amerika Samoa, Tokelau, Niue e oo lava i Manua. Ua i ai foi itu o Hawaii ma Taihiti ua faapena ona logoina mai, o lo o faalogologo pea i le alaleo lea a le 2AP. O se taimi o le masina o Iulai, Aokuso ua faamoemoe e faamaea ai lenei galuega. Ao le taimi lenei o lo o i ai le pou le tumau o lo o faaogaina mo lea itu o tatou fesootaiga ma faasalalau. O lo o taumafai pea le atinae fou a le Malo, e pei ona outou faafofoga i ai o le Digital TV. E faamalulu atu, ua tuai i le tele o nisi foi o sui mamalu o lo o musumusu mai i le tele o televise ma faasalalau i totonu o latou afioaga, ona o lenei taimi o lea ua tatou sui i le suiga fou mai le tulaga tuai sa i ai faasalalau i le analog, o lea ua o tatou oo atu i le digital. O le taimi lenei o lo o fausiaina, o le faamoemoe o se taimi e le i oo atu ia Iuni ua faapena ona amatalia faasalalau i le vaega muamua, Phase one, i totonu o le taulaga ona faapena lea ona faasolosolo malie atu i tua. E oo atu i le faaiuga o le tausaga ua faasopolia lo tatou atunuu. O le faamoemoe maua ina ia faapena ona faaleleia ia itu uma i faasalalau ia faigofie ai lea ona tatou matamata i ni ata lelei, ia faapena foi ni faasalalau manino. O le naunautai lenei o lo o i ai nei. E i ai nai itu o lo o tuuaia ai, ona o itu tulaga tau fanua o lo o faatutu ai pou faasalalau, ia faatutu ai masini o lo o taumafai i ai lenei atinae. E talosaga atu foi i aiga o lo o faapena ona faafofoga mai afai o outou fanua o lo o faapena ona taumafai ai nei atinae a le Malo. E tatalo atu ma le faaalalo ina ia faapena ona outou lagolago ma tatala le avanoa aua le faavaveaveina, avea ai outou ma faamanuia i le tele o itu o lo tatou atunuu. Lau Afioga i le Fofoga Fetalai, e pau na o le pau ia o mataupu sa lagalaga i finagalo i nisi o sui mamalu sa faapena ona afea lenei auaunaga. Ae tau lava ina oo sau faamatalaga i lenei itula, ua lau silafia e le mamalu o le Maota nei, aemaise Samoa atoa ua maea le auaunaga a se tasi o tamalii sa faapena ona avea ma Ofisa sili o Pulega mo Fesootaiga mo tausaga e tele, o le afioga ia Lealiiie Tuaimalo Ah Samu. Ou te manatu o se avanoa taua lenei, e faailoa ai le agaga faafetai, o au nei o le Minisita e fai ai ma sui o le afioga i le Taitaifono o le Komiti o Fesootaiga, aemaise o le afioga i le Minisita lagolago ma le Malo e tusa ai ma le auuanaga a lenei foi tamalii. E tele lona sao, o lona tomai ma lona agavaa ma lona taimi atoa, o le tele o lona olaga sa faapena ona tautua ai i le Malo. E ala i lenei matafaioi, matou te manatu ina ia faamauiina i totonu o lenei Fonotaga le agaga faafetai. E faaalua i lau afioga Lealiiie, ia tusa ai ma le auaunaga sa faapena ona tautua ai i lou soifua, aua le tautuaina o Samoa, e ala i lenei matafaioi o le faasalalau. O la matou tatalo ina ia alofagia e le Atua, ina ia faapena ona faamanuia le agai i luma o lou

soifua aemaise o si ou aiga, e tautua ai foi i le ekalesia ma le nuu. O a foi nisi tulaga e pei ona faafofoga ai i nisi o finagalo faaalua e faaauau ai pea le auauunaga. Ia tatou tatalo i le Atua mo lana faasinomaga ina ia faasino mai mo i tatou uma.

Ona faapea lea faatai se faamatalaga, oo atu sina agaga faafetai i si ou itumalo pele o Aana Alofi Nu 3, e momoli atu le agaga faafetai i la outou tapuaiga ma lo outou nofo tatalo. Ao lo o alo pea lo outou sui usufono e tauaveina lo outou tofi o lo tatou itumalo e tautua ai le atunuu. Ia agalelei le Atua ma ia faapena ona faamanuia pea ia outou uma, faamanuia pea si o tatou itumalo. Ae tatou fai tatalo pea e le gata mo lo outou sui usufono, ae tatalo mo lo tatou Malo ia faapena ona i ai le agaga o le Atua, ma ana faauuga e taitai ai pea le atunuu, aua lona manuia i lona agai i luma.

Lau Afioga i le Fofoga Fetalai, ma le paia o le Maota nei aemaise le faafofoga mai o le tatou atunuu, ua faaiu i i se matou leo, faafetai mo lo matou avanoa faafetai.

FOFOGA FETALAI: Faafetai i le saunoaga a lau Afioga i le Minisita mo Fesoootaiga ma Faamatalaga Tekonolosi, lau afioga le Matua o le Usoalii. Ua see mai le faasologa i le Afioga i le Minisita o Faamasinoga.

Afioga Hon FAAOLESA KATOPAU T. AINUU: Ou te faatalofa atu i lenei itula o le afiafi, i lau Afioga i le Fofoga Fetalai. Malo le onosai malo le tauatai. Faamalo atu foi i le Palemia ma sui usufono uma o le tatou Palemene. E faapena foi ona ou faatalofa atu i Ofisa sili o Pulega ma Faalapotopotoga Tumaoti a le Malo ua mafai ona tatou faatasi. Lau Afioga i le Fofoga Fetalai, e le umi sau faamatalaga e le umi foi sau tali.

Ua na o le toalua sui mamalu, sa afea le Matagaluega o Faamasinoga. Ao le lona tolu o sui usufono lea ou te vaai atu e le o i. O le sui lea o Faleata i Sisifo sa faapea ona aumai sana tuualalo i le faagasologa o le faamasinoga. Ae ou te le i faaauaua la lau faamatalaga i manatu o sui usufono e pei ona folasia. E avea lenei avanoa ou te fia molimoli atu ai le faamaisega i le tausii ia Ana ma le nofoaalo, ona o le valaau paia a le Atua i le tama ia Pau Sefo. O le sui mamalu o Faasaleleaga Nu 2. Ia alofagia e le Atua, ma le aiga nofo faavauvau ona o lana valaau paia.

E pei ona ave atu i le taimi ua fano, sa fesiligia e le sui usufono mo Safata i Sisifo, le agavaa o tagata e faaulu ai se talosaga mo se Poloaiiga le Tumau. O le tulafono lea o Fanua ma Suafa, lea na afea e le sui mamalu mo Safata i Sisifo. O le tali e agavaa, e soo se isi lava e agavaa i le talosagaina o le Poloaiiga le Tumau lea na taua. E pau lava le qualification po o le mafai ona faamaonia i luma o le Resitala e te tau i ai i le suafa pe e te tau foi i le fanua faaleaganuu. O lea e te talosagaina ai le Poloaiiga le Tumau. Sa taua foi e le sui usufono mo Lefaga ma Faleaseela le faasalaga o le le usitaia o le Poloaiiga le Tumau, o le Poloaiiga le Tumau lava lea e tulituliloa mai e sui usufono ia. O le faasalaga o lo o i ai nei i le Tulafono i le taimi nei. E gata mai le \$500 pe a le usitaia le Poloaiiga le Tumau po o le ono masina i le falepuipui. Ao le tulafono fou lea e fofou mai, ua i ai le agaga o le Matagaluega e sii le faasalaga i luga o le \$1,000, po o le tasi le tasi le tausaga i le falepuipui i le le usitaia lea o le poloaiiga le tumau. Ae pe matamata atu foi ma le totoa i ai, e pei e le lava lea faasalaga. O le a tuu atu pea i le komiti pe a ave la tatou Tulafono fou lea, i le komiti e toe iloilo ai lea vaega o le Tulafono. Pe ua talafeagai pe le talafeagai foi. O le sui usufono lea mo Faleata i Sisifo, sa tuualalo faapea e faaaogaina ia....

FOFOGA FETALAI: Malie le Minisita, sei tulai mai le sui usufono mo Safata i Sisifo.

Afioga Leana Ronnie Posini: Faafetai i lau afioga, sa leai se manatu e faalavelave i le saunoaga a le Minisita o le saunoaga malamalama. E pau lava lea o le tuufesili e lavea i lau lauga, lea ua saunoa manino le Afioga i le Minisita, i Poloaiga le Tumau. O lea na ou taua e faapea.....o lea ua saunoa le Minisita e agavaa uma lava i le Poloaiga le Tumau. O lau fesili sa taua i lau lauga, i le mataupu lea e tasi, o se mataupu i se fanua ae toa fa itu o lea e agai i itu o faamasinoga. Afai e agavaa uma itu ia e fa e fai poloaiga le tumau. O lau fesili i lau afioga i le Minisita, pe e leai ni feteenaiga i poloaiga le tumau nei e fa. O lea o le a ave uma i itu faamasinoga nei e fa, ae tasi lava le mataupu o lea e finau ai po o se fanua po o se matai. Ma le faaaloalo.

Afioga Hon Faaolesa Katopau T. Ainuu: Lau Afioga i le Fofoga Fetalai, o le agaga o le poloaiga lea le tumau, ia fai se poloaiga. O lea o le a ave i itu faamasinoga nei e fa, ae tasi lava le mataupu o lea e finau ai po o se fanua po o se matai. Ma le agaga faaaloalo.

FOFOGA FETALAI: Ia se i tulai mai le Minisita.

Afioga Hon FAAOLESA KATOPAU T. AINUU: Lau Afioga o le agaga o le poloaiga lea le tumau, ia fai se poloaiga e taofia ai. Na pau lava la le autu, e taofia ai le faia o se matai, po o se faiga o se fale po o se fuafuaga faapena. E na o le tasi lava la pe lua auala, po o le fai po o le le faia. O le uiga lena o le poloaiga le tumau, e le tumau lava se i uma le faaiuga o le faamasinoga, ona tumau lea. A o le le tumau la i le taimi lea i le va o le taimi e amata ai le talosaga agai i le faamasinoga, o le mea lena e ala ai ona tau e le tumau, ae lua lava auala, po o le fai po o le le faia. E leai se isi auala e ova atu i le lua. O lona uiga la a e alu atu e talosaga e taofi le fale, mo se faataitaiga, na pau lava lena o itu uma e fa ia e te taua i le faamasinoga pe ono, e lua lava itu e i ai, pe faia pe mananao e omai e fai pe le mananao e fai.

FOFOGA FETALAI: Malo faafetai. Se i... po ua maea le...

Afioga Hon FAAOLESA KATOPAU T. AINUU: E pei e pau ia o mataupu lau Afioga i le Fofoga Fetalai sa afea ai le Matagaluega o Faamasinoga. E leai se isi o le sui usufono mo Faleata Sisifo lea ua alu ese atu. E pei lava o le fautuaga, ia faaoga tatou Faamasino Samoa ia fai ai le faamasinoga o talosaga lea e fougou mai.

FOFOGA FETALAI: O lena e manaia, a le malamalama lava le sui usufono alu atu e fesili atu i tai i le Ofisa Sili o Pulega ina ia faamanino le mataupu e faapitoa lava mo lona silafia, ae taua le saunoaga a le Minisita.

Afioga Hon FAAOLESA KATOPAU T. AINUU: Lau Afioga, ia alofagia e le Atua ia faaopoopo le malosia aua lou valaauina, faapea foi le Taitai o le Maota po o le Afioga i le Palemia, faapea foi sui usufono mamalu uma o le tatou Palemene. E faapena foi i lenei itula ona ou faamalo atu i le tapuaiga a si ou itumalo o Vaimauga Sisifo Nu.2, faafetai le tatalo, faafetai tapuai, o la outou tapuaiga ma la outou tatalo lea e manuia ai lo outou sui usufono. Ma le faaaloalo lava.

FOFOGA FETALAI: Faafetai. Ia, ua oo mai le faasologa i le Afioga i le Minisita mo Aoga, Taaloga ma Aganuu.

Afioga Hon LOAU SOLA KENETI SIO (Minisita mo Aoga, Taaloga ma Aganuu): E talu ae popoe lau Afioga i le Fofoga Fetalai. Ou te manatu foi o lea ua tuneva le po ne i malomaloa le tamaloa mai Fogaa ona feala lea o aitu o le fanua, leaga o le fanua ma lona tapuafanua, o le eleele ma ona tapueleele. E ui i lea o le a faaaogaina le 15 minute ou te tali atu ai e tusa ma mataupu sa laga e sui usufono mamalu o le Palemene nei.

Lau Afioga i le Fofoga Fetalai e le toatele nisi na afea lenei Matagaluega, tasi, lua, tolu, fa, lima, ono. O lona uiga o le isi toatele o le matua faafetaia lava o galuega a le Minisita ma le Matagaluega, aemaise le education sector. O matou e tolu matou vaega, o le NUS, SQA ma le MESC ona taua lea o matou o le education sector. O le saunoaga a le sui usufono mo le Itumalo Tu Taulaga i Sisifo po o lou uso o Faumui, fai mai ua siitia mea o resitala foi nei a le NUS. Faumui e sese le mataupu lea. Vaai po o ai le matua lona na... o le saoga o le mea ua siitia mea foi ia o tuition, po o pili o polokalame la e faapena ona faagasolo i gauta i le NUS. O le mea na ala ai ona siitia ona o le finagalo o le Council i le sefulu tausaga talu ai ina ia siitia pili o tamaiti e fua i resources ma le tele ma le anoanoai o mea e faaaogaina i totonu o le NUS aua le aoaoina o alo ma fanau, ae le gata i lea o totogi o faiaoga. O le agaga la lona, o lea la e auauai mai ai e tai lua tausaga ma fai le siitaga. A faapea la o le 2010 na amata ai, o lea la ua 2018, lona uiga la e faafa ona sii, e tai lua tausaga ma fai le siitaga. O le saoga lona, a o le resitala o lo o tumau pea i le tulaga pei ona i ai. O le faamatalaga lona na oo mai ia te au e le VC.

FOFOGA FETALAI: Tulai mai le sui usufono mo le Itumalo Tu Taulaga i Sisifo.

Afioga Faumuina Asi Pauli Wayne Fong (Itumalo Tu Taulaga i Sisifo): Lau Afioga i le Fofoga Fetalai, faafetai atu lava i lau Afioga i le Minisita, o le mea taua o lona ua e fai mai ua sii. I le tulaga i le resitala, pei uma lava sa \$200 i le tausaga na tea nei, o lea ua \$325 i le tausaga lenei, vagana la e i ai se isi siitaga e le o silafia e lau Afioga ae pei uma lava o le tulaga lona e i ai. O lona ua e talia mai ua sii, ioe, o lea ua sii, ae na ona tatalo atu faapena, pe le toe tuu i lalo i le \$200 lea sa i ai i lea tausaga se i maua pea le avanoa e mafai ai e matua ona totogi le \$200 i lo le \$325. Ma le faaaloalo lava lau Afioga i le Minisita.

FOFOGA FETALAI: Tulai mai le Minisita.

Afioga Hon LOAU SOLA KENETI SIO: Ou te le iloa la po o ai o le a ou faalogo i ai? Aua o lea ua aumai le fautuaga, o tagata nei e fautuaina au, o lea e aumai e leai se mea o faapena ona siitai ai le resitala, na pau le mea lea ua siitia, o mea o totogi o polokalame foi nei o lo o faapena ona aoaoina ai alo ma fanau. Ae a faapea o lea ou te faalogo atu i le saunoaga a le sui usufono, e pei a. O lona uiga o la e taumate, pe o sii pe le o sii. Ae ui i lea, o le a ou toe tilotilo i ai lau Afioga i le sui usufono po o sao lelei au faamaumauga, e tusa ai ma le tala na aumai ia te au e le NUS.

O lau faleaoga i Vailoa, e sao lelei oe, o lo o i ai le tulaga e faanatinati le faleaoga lea na malaia i le afi, o lo o taumafai lava i ai le tatou Matagaluega

faapea foi ma le Matagaluega o Tupe ina ia faatino lea auunaga ina ia vave le process pei foi ona matau i le saunoaga a le Afioga i le Palemia, o lo o insure i lalo o le tatou Malo. O insurance company foi, se o le latou amio lava lea o le popoto ia e tosotoso ituaiga mea faapea e uma ifo e le totogia. A o le galuega o lo o fai ina ia vave ona faaauau ma faatino loa le faagaoioiga o le faleaoga.

O Gagaifomauga Nu.3, lau Afioga i le tamaitai sui usufono ia, o lena, e 30% pei ona e taumafai mai i ai i le totogi o faiaoga, e sao lelei oe. Ia matau foi o le tausaga muamua lena o lea ua faatino ai le tuufaatasia o le tulaga lea i fesoasoani a le tatou Malo i aoga, e \$14miliona lea ua i ai nei, o lea la ua i lalo uma o le one government branch, o lea ua faasoa atu le 30% mo totogi o faiaoga, a o le tatou galuega e faapena, e fetuunai muniao, o lea foi ua aumai lau fautuaga e toe tilotilo i ai ma toe avatu. Ae talosia ia ia talia e le Matagaluega o Tupe, ia ae tuu i luga i le 50% ua manaia tele. A o lea ua maua foi laolao na pei ona e saunoa, ia o le agaga lena o le fautuaga mai, aua e le faapea e i ai foi se atoatoa ia te i matou, e i ai foi taimi e fesasiai ai, ae aumai le fautuaga, e talia ma le agaga faaaloalo.

O Vaisigano Nu.2, faafetai i si ou uso a sui usufono, e pei ona taua, o lou faleaoga i Papa, o lea ua ou faalogo atu ua faagasolo atu i ai, a o lo o i ai lava faiga faavae e pei foi o le JICA, o le latou matafaioi o aoga primary school a le tatou Malo, e agai i ai lo latou fausiaina. Ai foi e sosoo ma Alataua, ioe, e sao lelei oe si ou tuafafine foi i lau talosaga, e le mafai ona galo. E talitonu foi o la e silafia e le Afioga i le Palemia ia ona o le kolisi, o mea patino a le tatou Malo e tatau ona fausia. O lea ua uma ona aumai le ioega a le Kapeneta ma ua uma ona pasia e le Kapeneta, na pau lava le mea o le saili o le seleni, o lea la e fetuunai ai muniao po o fea tonu le mea e aumai ai le donor e faia lou faleaoga. A o la e ua i ai, ae talosia ia ia fai i lena Paeaiga. Ioe. O lou foi lena faanaunaga, ia fai i le Paeaiga lena.

Ia, Safata i Sisifo, ia si ou uso a sui usufono, o le tele ia o fesili, se o le taua ia o au fesili, o tausaga uma lava e te lauga ai, e ese lota fia faalogologo, e aumai ai au fautuaga lelei e luitau ai foi i matou nei. O fesili na e fesiligia, o lea ua ia te au tali, o mea o technical issues e mafai lava ona fetuunai, ae a uma nei le Fono ona ta talanoa lea i tua e avatu ai tali. O le mananaia ia o tali a le aualii ia o le VC ma le vaega lea o le SQA, o tali e malie ai lou loto aua na o oe lea na e fesili i ai. Accreditation, o mea ia o aperenitisi, fai mai le aualii ia o polokalame fou o la e faatoa avatu ia latou, atonu la e i ai le taimi e accredit ai. A o le taimi nei, e amata i le tausaga lea, e takes time foi lea, o le isi taimi masalo e lima tausaga ona accredit lea ona maua lea o le tulaga lea e i ai. O le mea lea e fai mai o tamaiti foi nei lea e... o fesasiai lava, technical issues, tamaiti foi nei fai mai na tau muamua atu e faauu ae te i ua toe logo atu mulimuli e le faauuina. E sao lelei lava, a na o au se matua, ia ua afu le VC. E tatau ona matua tilotilo totoa faatoa ave ai le tala i tua. Ae sao oe. O si ou uso mai Siumu, ia o lena foi, o lou malae taalo ua uma ona fai, o lena foi ua uma ona fai lou faleaoga. E a e sao? Vaai la i ai?

Afioga Faalogo Iosefa Sopi: Lau Afioga i le Fofoga Fetalai...

Afioga Hon LOAU SOLA KENETI SIO: Ia, e pei na pau ia...

FOFOGA FETALAI: Malie le Minisita, se i toe faamaea mai lava le saunoaga a le sui usufono mo Siumu.

Afioga Hon LOAU SOLA KENETI SIO: Ia o si ou uso lea i Faleata Sisifo, ua outou iloa foi Leala e tele ona mafaufauga, e faatupu manatu mai ana fautuaga mananaia. Ia, Leala, se i e Minisita ona e sau lea, se i e Minisita ona e sau lea fai au mea na. A o le taimi lenei, o le SQA, e i ai lava ona Tulafono ua uma ona faataatia e mandate ai a latou galuega. E le soona oso o le oso oso lava i o oso mai i lalo o le primary level. O le a la le mea a le MESC e fai? O le mea la lea, Leala, na ou fautua atu foi ia te oe i le isi aso, a e le lavea... E ui i lea lau Afioga i le Fofoga Fetalai, o lena le agaga, ae faafetai mo fautuaga ua tuuina mai.

FOFOGA FETALAI: Malie lau Afioga i le Minisita se i e saunoa mai i le sui usufono mo Siumu lea e tulai mai pe i ai se mea...

Afioga FAALOGO IOSEFA SOPI: Faafetai mo le avanoa i lau Afioga i le Fofoga Fetalai. E leai sa... e i ai le manao o si ou itumalo na tuuina atu i le aso lea o le umusaina o le faleaoga o le kolisi lea sa ou talosaga atu ai i lau Afioga o le faatotogaina lea o le faleaoga. Faafetai.

FOFOGA FETALAI: Po ua maua mai e le Minisita, o le faatotogaina o le faleaoga o lona itumalo.

Afioga Hon LOAU SOLA KENETI SIO: E tasi la lea sui usufono e le oo i tua. O la e ua uma ona ave latou... se i toe siaki tasi lava. O lea na ou fai atu nei fai mai o la ua kiliva atu. Ioe. Ou te ofo alii. Se fai ma o i tua i tou itumalo sole.

FOFOGA FETALAI: Ia, ua fautua mai le Minisita e fai ma o sui usufono i tua e vaai tou itumalo.

Afioga Hon LOAU SOLA KENETI SIO: Ia pei na pau lea lau Afioga. O le matou itumalo, malo le tapuai o lea lava e malosi le tou sui usufono. Ma le agaga faaaloalo. Faafetai.

FOFOGA FETALAI: Malo saunoa. Ia e le uma lava le fia faalogologo i le saunoaga a le sui usufono mamalu. Ae i ai le manatu ona o lea ua tatou taunuu i le taimi e muta ai le tatou galuega, toe lima i le 11. Ia o le tulaga lava ia masani e faamaea ai galuega, ae ou te manatu o le a maua le avanoa e faamaea ai le saunoaga a lau Afioga i le Minisita o Tupe ma le tamaoiga mo le Aso Fono a taeao pe a tatou maua i le aso a taeao e avatu i ai e le Atua lo outou soifua lagimama ma le soifua manuia i le paia o le Palemene se i vaeatu le mamalu o le Kapeneta aemaise foi o Faauluuluga o Matagaluega ua tatou faatasi, ua leva lenei tauafiafi ae o lo o faapena ona outou lavapapale ma outou lava onosai. E faapea foi i latou uma o lo o faatino le auaunaga i le Fonotaga a le Palemene.

Ae tatou te le i tolopo ou te tapa le sui usufono mo Aana Alofi Nu.2 na te faaiuina le tatou Fonotaga i se tatalo.

Na tolopo Taualumaga a le Fono Aoao Faitulafono i le itula e 10:58 i le po seia aulia le itula e 9:00 i le taeao o le Aso Tofi, 24 Ianuari 2019.